

卷之三

柳塘吳慎思先生詩集序

嗚呼自柳塘吳先生歿說詩之家無所折中良時佳景賦才騷客刻燭操管每念先生相與咨歎或欷歔泣下也詩自三百篇後惟少陵兼人人所專上薄風雅下該魏晉其論文旨要則云別裁偽體後人都宗少陵獨元裕之闕其堂奧而其論詩大趣云即眼生心先生奉家訓負異才屏絕塵事沉思百家游意寥廓承少陵裕之而獨探乎作詩之源六情五際有所感觸流連吟寫不能自休一篇傳出讀者了然其事與其人與人言詩掉頭鼓掌口津津不已區雅俗別新陳聽者魂悅魄盪有所開發先生於詩惟其真也其為人故爾不務聲利甘裋褐確然有至性交少長

一以真率有惠於人無德色遇不平正言直斥人亦無怨
先生所敬愛雖道遠值風雨輒命駕留之飲一鮭菜必盡
歡或累日不去粉壁素几新詩纍纍其詩在其人已逝千
載下誦其文辭悲其窮樂其情志欲尚而友之矧親炙先
生夙承提命日相酬唱而忽成今昔開書帙而讀贈詩其
為灑淚豈待篇末乎大受少而學詩請益數十家既交先
生廼棄宿習欲抒寫性情之靈刻畫萬物之狀未卒業而
先生遽歿已矣詩道之傳不絕如綫矣先生常哀其所作
詩為若干卷且云古之為序者必宗師其人而為之乃有
所發明他日序余詩無取齒尊而官貴也先生父松巖先
生梅花草堂詩集潘檢討未為之序今先生門人周文學

故其詩虛和傲兀並用而不相妨至於酒酣耳熱之候諧
謔間發塊壘忽形而所謂色不淫怨不怒者固始終不少
衰也向使無先生之人而徒學為先生之詩則蠟言梔貌
盡屬不根牛鬼蛇神益增多口又何足與於詩之真者乎
嗚呼先生不可作矣生平講求經濟灼然可見之行事而
一不得試即商經推史各有論著而亦多遺散未為成書
所託以傳者獨其詩耳世多皮相之士親見揚子雲祿位
容貌不逮人安知不并其詩而輕之哉然而古君子屈於
身必伸於後文章有神斷難磨滅愚故敢援人以論詩以
正於世之知言者門人周龍藻百拜撰

自序

余少時從先仲父振六先生爲科舉文字先生教以聲韻之學一時吳越間有唱和詩社余見而說之私效其所爲作甚爲先生許可時時出以示人亦輒以爲大好余遂雅以能詩自負實未知作詩云何也癸卯家君自粵東歸見余詩而呵之曰若詩真可噴飯何不通若是余愕然而時塲屋初廢八股以策論取士家君日督課余兄弟但訾其詩爲不通亦不教以作詩法云何也丁未從家君官江右間有酬應之作輒命余屬草余因從容進言曰作詩云何家君曰詩有法汝未知之宜其不通乃爾也夫詩有源流焉有正變焉雖短章必有結構焉雖一字必有依據焉

夫然後盡態極妍以爲陶冶性靈之物故其下筆皆有根
柢而詩可傳余唯唯承命而退余然後知詩之有法而余
少時之詩之謬也無何家君以事去官江右胡悅之陳伯
璣燕山周伯衡皆過從論詩余從旁側聞其論議大約以
清真淡遠無意於工而工得之自然者爲極則至其所謂
開闔步驟章法井然未嘗不與家君異車合轍也故余以
家君及諸先生所論之法爲詩自戊申始又十年余始識
鈍翁先生先生每謂余可與言詩其法較密採摭余利病
必中窾要嘗教余以古人爲詩未嘗妄作雖極瑣屑題皆
有感託余因先生言求之唐宋元明大家集中皆畧得其
法與其所以立言之旨益知向者家君及悅之伯璣伯衡
諸先生所論皆具有本末也同里朱愚菴先生謂余鈍翁
數稱子詩子詩所得云何余具以所聞者告之先生曰子
言是也吾聞之錢宗伯之論詩良然夫以余之愚陋幸得
聞先生長者之緒言其於詩不至茫然一無所知識然援
引失據擬議非倫必尚有可指摘者冀當代知詩者一一
譏彈則余今者雕板之意也柳塘吳祖修慎思書於梅花
草堂

柳塘先生詩集序

歲甲戌柳塘先生歿嗣子大庚長庚暨姪晉濤編次遺詩得十二卷越八年始克授梓而命門人周龍藻爲之序曰天下有真人品然後有真詩詩三百篇感深而積厚雖小夫賤婦肆口而成者皆可以動天地鬼神而後世言詩者竭終身之學力爲之顧所作有傳有不傳無他昔之詩惟求自道其性情而今之詩或以供應酬牽率翫敲悅衆之具此真與不真之別也先生負穎異之姿少承家學讀書纘言具有原本既連應有司試不見知遂專用力於詩其學以少陵自非有爲而爲則詩不妄作者爲宗而氣魄之昌參諸昌黎興寄之遠取諸長慶才情之豪宕博諸眉山

遺山千變萬彙不主故常而所造至深且厚蓋先生之詩皆先生之人爲之也夫本之撥者榦必傾理之邪者文必亂而先生之爲人天資忠孝發言制行悉依於名教故其詩有溫柔之旨而無乖戾之詞視錢財如糞土家素貧藉學俸以爲養而非其所有則一介不妄取性尤不喜見權貴人嘗一入長安遊而卒不爲勢利所動故其詩有耿介之風而無銜鬻之習熟於古今成敗得失遇一事是是非非必直達其所見故其詩指陳發露不雜於媵媵待朋友不爲翕翕熱而磨切過失周旋患難絕無所沮避故其詩質直慷慨不涉於崖異胸襟坦坦然遇小書生能折節下之而一時挾重名以奔走天下者欲列之門下士而不屑龍藻陳進士萇暨先生猶子晉濤校刻先生詩稟先生意屬大受文其端大受義不敢讓惜乎知識既下學殖復落不能鋪張先生之教使肄詩者由先生梯裕之少陵而發三百篇之指惟咨嗟涕洟撫伯牙之琴絃邈然山水之間也

康熙三十八年己卯仲冬月嘉定張大受日容書

柳塘詩集卷一

詩三十二首

古詩七首

我思天與地亦是陰陽爲元氣久渾淪乃復胚胎之當夫
鴻蒙始其體真嬰兒細縕母萬物端倪不可窺渾沌鑿既
死靈蠢華以滋壯盛不須更搖落旋復隨吐哉昆明灰浩
劫無窮期

兀坐一室中澄觀若止水羣動旣已息萬籟不到耳方寸
涵靈臺光明疇與比比中無將迎安用愧與偶蒙莊曠達
人亦未解斯旨如何逃虛空跫然足音喜
至人貴無我大道體自然揮塵析理奧折角窮詞源仁義

詎芻狗詩書非蹄筌彼言實炎炎我腹堪便便天機忽自得神解無人傳

大火發涼燄寒泉成湯池石言聽茫昧神語音參差術士謂之有哆口談怪竒豎儒乃曰無詞窮將安施至人顧之笑焉用媿媿爲所以六合外不論但存之

菌不知晦朔蛄不知春秋詎乏大鶴壽亦有貞松適質隨物化盡精與元氣遊服食說竝誕委順理最幽顏淵與盜跖豈足窮浮休

陽窮在大夏一陰生猶微江河勢蕩潏無非涓涓爲達人貴早計愚者昧先幾博物慕張華綴文尚陸機穎實蘊禍胎賈曾煽危基劔光衝已滅鶴唳聞尚悲才能不用貴理在無形推上下千載間此義誰知之

少陵薄文章謂非道所尊不讀破萬卷何由聞斯論經史足驅使今古堪胚渾寂若萬象滅燦如衆星繁根柢有至理刊落皆陳言以此爲詩史孰能窮其源

牛孃湖俗呼爲長漾周遭二十餘里余先世家梅塘自元季始宅於此湖之陰迄於今不遷因歷敘吾家盛衰之故終冀湖之靈有以相之焉

東南富山水其藪曰具區導源自天目濫觴漸繁紆苕霅承其流一一引入湖復散作百川藉爲蓄洩資海若何灝漾無乃此尾閭牛孃未云廣方幅廿里餘煙火數十處聯絡成村墟物產足菱芡水族饒鼈魚簦箸即漁父耒耜還

耕夫厥田誠下下堪蹶償官逋游惰變斥鹵胼胝為膏腴
時俗近澆漓古風其唐虞憶我之前人初于梅塘家去此

兩牛鳴甲第連雲居趙宋丞相後氏族冠通都宅分南北

院橋號東西吳

今梅堰東吳西吳兩橋家君詩云雙橋別澗瀦蓋紀之也

呼童算橘稅

教客收漁租子弟竝修謹法網復闊疎杜門無俗事惟讀

所賜書或時通賓客往來皆鴻儒弄笛有鐵老遣畫聞倪

迂

先野塘公與鐵崖諸公往來具載譜牒

翩翩在濁世差足窮歡娛天運不

可知盛衰竟乘隙鬼瞰高明室斯理良不誣咸陽付一炬

夜半傳軍符

元至正丙午宅燬於兵

性命幸得脫敢憂田園蕪宗族

各散處無人問粉榆我祖有遠識一椽托菰蘆即今所居

里州州成蝸廬瓦或後寢蓋茅猶前榮誅廚畜赤脚婢門

應長鬚奴曲港容舴艋小徑通樵蘇學種邵平瓜親牧孫

弘豬一洗承平習庶幾垂令圖耕莫釋耒歎讀須帶經鋤

但貽之以安初不掛賢愚至今三百年子孫守其模舊第

斥漸廣歲獲儋石儲田逾洛陽頃桑過成都株大堤種楊

柳水榭栽菱蕖其西蒼松楸兩兩開青烏陰陽竝迴抱風

氣亦扶輿歲時每一視行列魚雅如兄弟各勸酬此禮猶

古初其後四五楹倉琅交綺疏鄴架貯圖籍秘玩羅穉穉

鼎色古斑駁琴紋斷模糊購書必宋雕展帖皆唐摹諸父

雅愛客席門常停車榜舟竟訪戴置榻旋迎徐中有博雅

者鑒賞為歎吁澄懷便聯句高興仍挈壺忽思汎湖中張

我十幅蒲雲樹景明滅水月光有無恍擊馮夷鼓疑吐驪

龍珠大船集賓朋乃是嵇阮徒中船容儉從共醉滿眼酤
小船載家具吐嗟供百須飯炊長腰米鱠縷四腮鱸有時
鬪茶竈水脚旗槍呼有時揮筆牀腕底龍蛇趨金谷庶無
媿西園良不殊是時諸羣從環珥傳瑤瑜少者爲羯末長
者當封胡未許帶羅囊何妨竊珊瑚蠟鳳見雅量累甚知
名駒我幸黃犢健好弄不顧軀跳擲騎屋棟詰屈辦奴鬚
鳩車并竹馬其樂也只且胡復邁不弔金石燔秦灰家道
遂中落幾難具朝舖伏櫪伯仲父先後薤露歌歲劫悼康
成星象憂謝數家公宦減產小草甘莊樗我復不自振坐
送白日徂茅患秋風捲交憐舊雨俱鶯鴨不惱鄰雞犬各
識途孝養師南陔潔白詠絳趺少年縱不達瑁稜何爲乎
倘不替舊德湖靈其相予

金陵

東海揚塵原廟灰觚稜城闕重徘徊一年王氣真如閩卅
載留京不作陪豈有風流能創業空教詞賦每興哀月遊
靈爽今何似不及昭陵石馬來

劔

只此爐錘力能令造化回工真爲妙手器果不凡才寶斲
成龍去金精變虎來問誰稱識者萬古重張雷

過惜陰樓留宿昔年讀書地也

昔年讀書地重憩此庭陰飲酒得真氣彈琴無俗心几緣
銜尾鼠檐噪掉頭禽中夜微風入眼醒寒布衾

梅子

兩樹寒梅結子遲。青青如豆綴高枝。誰知他日調羹物尚在薰風長養時。

風雨志異

頗怪蒼天漏真疑大地翻。怒風吹浪立驟雨。蹴溪渾庭似

通泉脉牆俱塌水痕依稀神廟日。故老尚能言。

萬曆戊申吳中大水

去今甲子一週矣

荷葉

三月新荷滿池塘。生綠煙浮錢綠水。面擎蓋立風前盛。酒心俱醉裁衣體。欲仙若為歌樂府。愛殺是田田。

荷花

芙蓉聞楚些。菡萏聽陳風。謝客詩能似張郎。貌不同。水光涵影碧。日氣抱花紅。寂寞採蓮處。猶開昔日叢。

題歸文休畫竹

嘉隆以來號名宿。文章獨數歸太僕。東序金鐘竝大鑪。詞林項背公眉目。薰染家風有子孫。芝蘭寶樹庭芬郁。待詔高風不可攀。豐年為玉凶年穀。歿後曾登啓事書。名高何用沾微祿。其餘諸孫皆絕奇。腕底煙霞起林麓。墨妙銀鉤勢蜿蜒。但學家雞勝野鷺。閒將粉繪潑生綃。襪材常得千尋竹。意在筆先妙莫傳。渭南千畝曾中熟。請君從容展此圖。坐覺蕭森生尺幅。中挺橫斜三四枝。歲報平安在淇澳。霜幹真疑癯似松。風姿應羨清于菊。石旁點綴又孫枝。玉

立亭亭映茅屋風裊新篁已鬱蔥雷驚生意猶含蓄却似
公家貽厥時兩世孤高媚幽獨嗚呼好手真蹟難長慶畫
竹誰收錄卷帙剛存白傅詩裝潢不見蕭郎軸清貧老可
摹篋簞屨本流傳遍書簾何如此圖真寫生一種清幽韻
空谷我欲將之張高堂天然興會畱芳躅風煖宜將濁酒
傾晴和定把殘碁覆不妨便號此君亭刪却閒房舊花木
東洋史氏觀沈啓南雨中訪友圖

沈公寫圖能寫情冥思運入天機精裝潢曉掛高堂上素
壁不覺煙雲生當日結交皆才伯匏菴尚書神仙客同時
墨妙枝指生最晚衡山竝莫逆我鄉亦有史西村興酣落
筆才瀾翻常與數公互主客風雨聞叩溪邊門今看此圖
得真意訪戴船牽閣平地中有風流澹蕩人雨墊角巾懷
漫刺主人澆書正頽放寧知好友來相訪僮鶻熟客倚殘
籬笑指船窗作喜狀嗚呼好景公能採筆墨真化爲煙嵐
畫中之人識誰其主乃西村客啓南君不見李家將軍稱
畫師西園筆法人羽儀何不更添宗伯與文祝一時雅集
此亦足

晚過梅堰

晚過梅根渡天寒雲漸停到家無數里望眼見丘亭
吾里東有
野燒橫溪白漁燈隔樹青雖然鄉語慣尚未近門庭
亭曰斜路

望古堂詩爲山年弟作

望古堂者我先世父孝靖先生讀書結客之所也

鼎革後歸隱於此堂前植玉蘭海榴蠟梅數種牆
角木香一叢東榮牡丹俱繚繞可愛中庭瓷缸大
者栽芙蓉小者蒔蘭菊堂後植薔薇天竹各數本
繚以垣牆隙地梧桐二株高數十尺扶疎屋上中
藏有明一代文集數千卷竹牀木榻位置楚楚沒
後十有六年梧桐一為大風所拔玉蘭海榴芙蓉
蘭菊先後摧殘頃老梅亦復零落矣庚戌春余與

山年弟讀書堂中因歷敘先生生平作詩示之俾
無替先業云爾

讓王竄勾吳梅里有芳躅世家首表之于今尚馥郁代有
潛確人不替先王德嗚呼孝靖翁天何奪之速才大為用

難斯人帶空谷光如燈在帷輝若玉韞璞少年觀羣書
架手隨觸天然生知姿一覽不再讀援筆試屬文千言翻
水熟曹劉可方駕命騷足奴僕小試于有司一見驚刮目
謂當摩蒼天高舉振黃鵠韓愈勉大慙公孫慣曲學吹竽
固不能歌郢祇自辱以茲不得意連年躡塲屋唯喜交賢
豪雲龍上下逐常置鄭莊驛時倒陳遵牘廣會必千人修
刺每一束百金購名文郵筒走滇蜀甲乙雜丹黃一一皆
實錄西北喜雄剛東南苦繁縟去取有深意人人得所欲
至今操觚家咸思受磨斲夫何來讒夫彌天布謠詠遂令
英主朝幾置同文獄當其虐燄張顧視頸欲縮先生如平
時意氣不戚戚及免刊章追雅量益自得肯效轅下駒日

受世局趣行藏惟儉德終不自銜鬻乘時即雄飛不遇甘
雌伏所悲國事非數歎邊境蹙至甲申間天運竟百六
銅駝生荆棘蘇臺走麋鹿爰有祖劉交夜聽荒雞蹴身酬
君父恩不復顧宗族思吹靈胥簫擬擊漸離筑先生折簡
辭我實顏怵怵堂有衰年親晨昏供水菽君爲文山死我
當臯羽哭擊碎竹如意悲歌振林麓從此長避世長鑿掘
黃獨脫却頭上巾裁成隱居服但得龜尾曳無嗟鳧頸續
閉門如深山滄江詹尹卜艸堂歸靈光俯仰殊自足壘石
未成山激水還似瀑堂蔭百尺桐園放千竿竹夏初蒔蘭
菊分時接果木荷沼灌疏泉藥欄覆輕幄玉蘭越檐高海
榴粘牆活木香抽弱枝蠟梅挺樞貌不知霜雪欺焉記雨
露沐堂後繚垣牆縱廣纔方幅叢桂體修直薔薇勢繚曲
山茶乃殘膏天竹直臙馥花每冒春開葉多耐寒沃言樹
在背襟點綴謝家壑中藏金石文磊落數千軸一代文與
獻幸免秦灰酷雖非搜石室亦可上秘閣閒便展卷看倦
即枕經宿借此一寸書遣我愁萬斛賦詩宗少陵論文摹
玉局獨不肯妄作矜惜過片玉舊交如晨星相對必剪燭
哭泣俱不可此意更摧剝茗戰許縱橫酒兵從往復魯望
竈堪攜淵明巾足漉好事客固佳敗意物殊俗岸幘常逍
遙拄杖時不于山橫洞庭青水導天目綠忽悲身世乖頓
覺天地覆至行如元方閨門見雍睦每至伏臘時勸酬呼
仲叔仲父姿頗奇家公質太樸對若師友嚴見必衣冠肅

一生喜施予阿堵羞障簾義感雍伯漿仁餼子皮粟如何
乙未厄百身遂莫贖方過歲劫蛇竟嗟承塵鵬弔車及千
乘友道一何篤易名彷彿真曜孝靖表遺直

公卒之明年秋四郡社友率其

門人私謚孝靖先生

我纔屬今文君未上家塾即今十六年嶄然露

頭角生計益蕭條世事日刺促樹中所遺書強半付回祿

雙梧向背生一株瘁腹育荷榴與菊梅先後兒童斲頗窺

鼠竄根恍疑蛇在腹舊時盍簪堂終歲少剝啄白日落蚬

蟻黃昏飛蝙蝠今年邀我過鍵戶共磨琢苔階草漸除隼

几塵重撲君履不足矜經史殊可樂毋慕鄉曲名毋邀非

望福毋恃己錚錚毋因人碌碌庶我為他山將子亦員輻

輦之無高論日把前人勗

簡村

皇帝九年夏六月十有二日颶風發太湖水挾雷雨飛蟄

蛟走出蒼下窟老龍夜奉妖孛牒噴沫張牙復鼓鬣勢驅

海若走天吳盡倒官堤與城堞江村地形真釜底一生衣

食太湖水常攜笊箸犯風濤不信身軀還喪此東鄰覓子

西尋耶前村又見悲無家雨師憑陵風伯怒可憐民盡為

蟲沙水晶宮中坐河伯有司歲歲沉圭辭此時掩耳胡不

聞前日效靈今助逆君不見皇家高官尊於帝不急災傷

急租稅俸薪月費水衡錢日高鈴閣門還閉

陶九成輟耕錄載袁可潛檢田吏一篇去年吳中大

水余身役踐更其事頗類感而賦此

去年妖孛亂玄冥天公夢夢醉不醒一雨百日船入市眼
見官租沉水底六月颶風復作惡江潮併漲淹城郭府帖
下縣催勘災竹簽連出風火雷縣官不肯下鄉去倉皇報
得災分數文字盡出老吏牘遂把荒田批作熟煌煌黃紙
免官糧戶戶燒香祝 聖皇誰知我田不得上開倉不把
毫釐放無米難教布春種况復冤喫公庭棒囊空拚不愛
肌膚但恨無肉填鳶鳥里長逃竄甲首死催檄雪片比不
起何不當初災報全官民兩便民歡然

題洛神

飄裾翳袖自天人冉冉凌波想欲真只許思王爲後進何
曾甄后作前身

蜜蜂二首

遲明小隊罷排衙不是含英即咀華此日論功誰第一
擒玉先摘牡丹芽

玲瓏戶牖也成房旭日薨薨半向陽覓得主人公正在百
花深處坐蜂王

聽雨詞

坐擁殘書氣未降夜深獨自倚寒缸何妨數點迎梅雨都
入西風打紙窗

慈感寺友人夜話

慈感禪房酒半溫鈍根不復辨風旛青陵臺事誰能記行
秘書傳王柏原

過雙橋

繫馬雙橋古道邊，俄驚明鏡吼奔泉。題詩最憶青蓮句，也是銀河落九天。

春日武陵却寄

嬉春士女滿莊墟，是處繁華惹夢思。踏遍西泠舊遊地，桐花落盡緩歸時。

撲燕次鄴衣大兄韻

爾族來何處，炎天縱復橫。宵能爲黠賊，晝已伏貪兵。斂跡飛聲疾，呼朋鼓翼輕。此軀何太細，遺種最難清。入室耽耽俟，登牀隱隱轟。酸餘膚覺粟，墳起肉遭黥。覓縫將攻壘，緣綃直薄城。聲喧無定伍，勢蔓似連營。策豈忘驅滅，軍須肅

鼓鉦。海牛疎可按，紈扇掃難平。怙惡終當撲，逃歸許並生。薄醜權作炬，吹焰便能烹。法網今非密，軍容舊有聲。潛藏思穴隙，突過駭心旌。歸路愁燃爆，當途拒火棚。如魚臨釜泣，似鳥望弓驚。全力爲搏兔，乘風豈取鯨。虎嬰防後至，巖電早前偵。煙觸搜長喙，風迴燎怒鬣。桃笙方妥帖，霧縠賴幪幪。罪在先聲討，師因以律貞。老饕宜暫息，殘髓莫輕爭。境外憑渠育，寰中即汝征。休教紅燧舉，長放黑甜寧。卧榻容酣睡，驅除感物情。

兒子度庚自川署歸患疹幾死有起色志喜三首

自昨還家後，纏綿疹疾中。歲逢辛亥劫，生許甲辰雄。愛汝眉偏白，憐予眼尚紅。但須災難少，何必到三公。

柳塘詩集卷一
毒自胎前種方從肘後醫怪容難識汝錯語誤呼誰官舍
蒼黃日客途風雪時病緣良在此童子不無知
爲此關情甚遲遲向鄂州俶裝臨道左牽袂坐牀頭竹馬
遠須棄羅囊莫再畱老親聞爾在不醉可忘憂

柳塘詩集卷二

柳塘詩集卷二

詩一百七首

辛亥夏之楚作四首

北風吹浮雲波穀漸凌亂遊子適異鄉惻惻腸堪斷前期
戒僕夫辦嚴赴江漢病婦搜畫篋補綻日至旰中堂呼竈
婢次第列杯案邀我弟與兄勸酬爵無算臨岐重欷歔丁
寧語各半勿復念藁砧刀環指秋鴈

大江日夜流陰晴變氣候波濤大于山魚龍跋清晝我昔
下漢陽煙艇帶傾覆拚從靈均遊只恨未丘首驚定剪紙
招客魂尚難收從此東南行誓不長江走如何違息壤鳴
榔但仍舊

鳴榔亦何為吾親官漢渚誤中考功法事未難區處誰憐
杯中蛇乃屬辟間弩去國不潔名此義聊可取一官猶遺
弓得失何必楚人其當見原嚇莫用腐鼠

久欲為此行期定輒復改有兒生八齡狀貌甚傀儡家公
喜弄孫膝前當萊綵如何官舍歸一病幾作鬼每欲歌驪
駒念之殊不已匪惟舐犢愛亦恐傷親爾刀圭蠲沈疴遣
愁賴此子為報白頭人眉間黃色起

初至四安

一棹陰晴泊四安奚奴持炬理征鞍少紆江路貪程近初
入山行覺道難驢背墨囊騎更穩雞聲催曙起猶寒平生
素有煙霞癖此日何為眼倦看

驢背

千巖春卉發華滋义手能成畫裏詩此日宣州驢背上肯
輸殘雪灞橋時

宣州道中

夙昔慕微尚厭彼城市塵雙屐常自蠟柴車有時中山必
履其巔登頓忘昏晨非不憚艱險愛之瑩心神宣州富山
水茲行殊不貧惜哉懷抱惡何以愜我真佳者領其要愧
此山中人

與嚴宜之姻丈方舟話舊

屢作晴川客江行未寂寥隔船談往事挂席又今朝驚喜
當流立魚看映日跳土風君已熟何必復停橈

舟中小集

客裏成良會船窓飲亦宜
食單鋪席窄襪被坐人敲玉粒
慳偏美邨醪醉獨遲
萍蹤聊聚首不必盡相知

晚泊魯港

小市千家集滄江一棹來
亂雲依晚樹纖月映深杯
旅夢隨更短鄉心逐水回
題詩須到日此地早相催

重過九江

小孤風勢轉百嶺仄柁敲帆信有神
但使客途長利涉何愁宦海尚
論成約略如前日廬阜分明似故人
復覺一重還一掩盡忘機事樂吾真

曉行

侵晨初捲幔拄頰且逍遙
日色將蒸暑山光早放朝
憤因搔首岸酒爲解愁澆儘可生詩興
江天景物饒

過馬當

馬當江路險難行王勃曾于此問程爲乞好風君莫靳
輕帆一夜達湓城

賽神

大江源岷山晝夜無停時
委折數千里其勢實崎危
命爲瀆之長秩祀崇其儀
帝曰爾效靈圭辭在有司
奈何荒江側巍峩蠹淫祠
亂茲玄冥職瀆彼水府祇
迎神或簫鼓視牲亦鏡吹
篙師脚不鞮主人冠接羅
分獻庭廡間跪起時參差
願乞換施靈挂席愜所期
苦乏鄭樵風蚩蚩亦何

為

田家鎮

放舟溢城浦漸過蘄州界潯陽何蒼茫混一昔九派緣江
蟲層巒紆迴若圖畫廬岳聳峻嶒羣峰妙根蒂依稀見遠
邨獨立山之隘桓桓甘將軍昔曾此築砦社稷有興亡江
山無成壞楚風殊輕佻桔槔見機械兒斫艾絮回婦織桃
笙賣肘客算錙銖降神善狡獪我欲解維行波濤忽澎湃
山鳩先雨鳴江豚望風拜晦冥變魚龍雷霆走精怪須臾
色少霽襟期正瀟灑晚飯坐柁樓纖月山頭掛

小孤

小孤大于拳獨立無依附一柱砥江流九派悉奔赴疑是
鬼工為渾沌所鎔鑄象形呼作鞵造物脫隻履孤又音諧
姑曾否彭郎娶齊諧或寓言附會成掌故肯以女嬃形血
食于道路目為紫姑流山靈得無怒大孤凸湖中遥遥互
回顧我詩告同行勿為愚蒙誤神其一听然江天霽煙霧

望匡廬

煙艇輕帆過小孤香爐峰在望中紆船窗晝卧看山色此
是宗家薛上圖

辛亥五日舟次漢陽

江上纔行半月程却逢五日漢陽城遙遙漸見魚龍戲隱
隱如聞鉦鼓聲可惜獨醒湘水客誰憐同調洛陽生篙師
指點停舟處一往猶深懷古情

謝蒼韜荒贈碁

頻寫空函與所知感君先寄永昌碁碾同溫潤藍田玉燒
似輕堅大邑甃寶井有珠輸幕府石屏如畫入曹司此鄉
奇物真難報珍重荒齋落子時

武昌鐵牛廠

我行金沙洲道經鐵牛廠云是厭勝法此理殊恟怛杜陵
有老人詩薄風騷上高詠石犀篇千載金石響楚風尚巫
鬼頗訟李冰狂嗤點飯顆翁見聞猶未廣嗚呼宇宙間陰
陽互消長王道無偏頗玄冥受彫鑿江湖行地中天地兩
盆盎我思鼓洪鈞鎔此雙牛像銷為農夫器萬民得所養
鐵亦得其職甫言誠不妄

張王碁

碁在漢陽府城南俗訛為張睢陽家君定為漢陽
王故作

仙李第四葉孤根實崎危鸚鵡孕雛鳳棄之於路岐奪彼
琅玕實占彼梧桐枝斗南有老烏反哺母氏慈拳身高岡
上長鳴何其悲欲塌鸚鵡翼以待鳳凰儀幸有五鷲鳥非
種誓同治鳳乃歸丹山鵠亦守故雌百鳥各禮奉鳳羽重
葳蕤如何鳳不終旋歌德之衰逐彼鷲鳥去一在漢之涪
廟食于此郡誰曰非其宜

訪魏名閼兼閱其飛白畫佛二首

土銼蘆簾卧榻穿客來如坐米家船雲箋十幅臨章草溪

絹雙鉤類郭填賸有兔毫堪作塚尚留鸚眼不須田世間
樂事誰逾此相對還誇醉欲仙

江邊茅屋卷三重遊戲丹青興未慵試貌胡僧形似鶴旋
添老樹偃如龍名閩令
似能畫伯時自昔能描白元鎮從來不抹濃
每誦少陵題障句雲門深處問萍蹤

舊儋守何主洛自隨移家武昌折簡招飲醉後作此

解嘲

漢東公子儋州守不愛田園只愛酒薄宦常兼麴部銜投
閒竟署高陽叟一從盡室去隨州幾載移家對夏口盪漿
寧辭拜浪婆仰天直欲招酒母會我窮作漢陽遊感君邀
向武昌走雅集須持畢卓螯華筵但剪林宗韭深媿纔能

蕉葉三連看酣飲叵羅九茗戰縱橫尚抗行酒兵往復難
持久君嘗勸我我不辭我起避君君莫肘罪狀難逃惡客
名刑章先定釀王手頭項抽筋眩欲旋口涎流沫難成嘔
如此狂奴亦可憐便呼俗物何嫌醜前生無復種酒因今
日不妨殿人後

曬道人歌

道人昔住峨眉峰手捫絕頂摩蒼穹閉門學煉文武火鉛
思作龍汞爲虎更遇異人受真訣一年易氣兩年血吐納
天池雙跳九坎離交濟功竒絕從此聊爲汗漫遊芒屨走
過秭歸州忽然放下蒲團坐正是當年跨鶴樓雙趺疊膝
手持印却似山僧初入定定中心境兩忘機撼之不動口

不應一坐九年功不輟渾身皮膚黑似鐵冬膚起粟不知
寒夏背生鹽未云熱此身跳出寒暑外渾淪元氣真滂沛
何須薩道解神通不羨麻姑善狡獪我昔誦習周孔言百
家諸子皆旁門但就被法論優劣此亦枝葉非本根豈有
造化司晝夜而與口鼻為吐吞吾聞生人身正如小天地
雙睛懸日月照耀無停轡血脉象江河流通不凝滯舌端
妙言辭亦若大塊噫氣血乃水火是為坎與離嗚呼有形
之物無不毀地老天荒良有以一啼墮地幾何時久矣鑿
破混沌死齋精葆真可長年世上神仙皆妄耳

讀黃鶴樓詩

晴樹芳洲自古今客來爭向此登臨司勳絕唱真難和供

奉虛懷雅更深雲裏有仙招鶴侶樓頭無笛作龍吟千秋
遺跡成佳話又見撚鬚費苦心

大別興國山房喜遇韓子蘧先生

路熟緣江尚近郊僦居猶是蓋頭茅對君直欲研心相媿
我還須載酒肴過客每題長句贈借書隨付小胥鈔歸攜
秘論兼佳什展讀帷燈未忍拋

辛亥中秋

坐聽西鄰咽管絃未知歸計是何年良辰半向愁中度秋
月初于客舍圓鶯脰三篙平似掌鶯脰湖在平望去我鄉二十里虎丘一點大
如拳遙知此夕登臨處也為羈人興索然

書邸抄後呈家君

大典何堪任愛憎。考功法爲中廉能。催科自署道州考戶。
口不如膠郡。增李蔡。下中誰復辨。王尊賢。佞總難。憑劇憐。
鱸鱠秋風味。絆却牢籠尚未曾。

與趙晟野對弈適韜荒姻丈自海昌至漢上喜而有

作

幾局楸枰斂子餘。查驛云至語非虛。迎門漸喜鬚眉是。入

坐還思談笑初。余於戊申初冬始識韜荒劇談湖北風波今若此。江

東米價近何如。眼前定算知誰勝。只合與君讀異書。

燈花時在漢上

玉蟲金粟影交加。共道孤檠夜放花。遣殺客愁曾不去。有

何喜事報儂家。

送友還吳寄訊家孟

送汝還家意倍殷。武昌官渡帶斜曛。息息不及將書寄。說

與平安報卯君。家孟已卯生

同韜荒渡月湖過生生林訪王閻如徐初齋因留花

前晚集別歸奉寄

月湖一棹已高春。剝啄禪房話近蹤。是客看題誰作鳳。無
人不數子爲龍。麤豪欲索瓶中酒。頗領同聽飯後鐘。日暮
息息君莫笑。明朝招手敢辭從。

秋晚代寄

歸時曾訂采芙蓉。此日迢遙意倍慵。鴈結陣來疑有字。燕
辭巢去竟無蹤。愁驚一葉思君瘦。寒到三秋變妾容。欲責

行期難捉筆。口傳音信話。嗚嗚

次韜荒見贈韻奉寄二首

歌驪曾記促離觴。三載真同參與商。顧我何時消傀儡。喜君猶未減疎狂。客懷敢望如前日。詩思無非在故鄉。幸得人豪來夢澤。平吞八九看誰當。

昨宵密坐共傳觴。葉落秋聲恰奏商。司馬縱逢遊亦倦。次

公何必酒纔狂。

余不飲酒來詩有醒狂之目

無多芥子容人世。不遠華胥是

我鄉。今日得從牀下卧。一時湖海果誰當。

不寐

偶移衾枕過前榮。展轉誰知此刻情。每為思家宵便立。縱然識路夢難成。短檠定解憐孤影。長夜何時殺五更。獨怪

砌蟲吟切切。故將哀怨到天明。

韜荒烹峒芥遲予賦示

羨爾新從峒頂旋。旗槍初試折鐺邊。數堆枯葉風微吹。一縷輕煙火活煎。香入妙時清更老。味堪回處澹逾妍。自來桑苧翁成癖。可許能知廟後賢。

漢陽懷古

愧我還同汗漫遊。每於陵谷起深憂。千家闐闐郎官水。一望波濤處士洲。當日舉杯真曠達。何人作賦最牢愁。兩公姓氏俱千古。屈指猶為第一流。

重九前一日韜荒攜尊招予過生生林適山陰潘六奇在坐六奇自蜀宰罷官家於大別山之陽因賦

此贈之

重陽節近一樽開。人世萍踪得幾回。我自煙波鄉裏至。君從山水窟中來。宦情甚愛安仁拙。詩思頻將邠老催。風雨句成閒賦就。一時傾蓋樂銜杯。

侍家君渡江時有風濤之恐

日斜問渡漢陽門。雙槳中流浪忽翻。人世孰能容李白。風波寧不繫章惇。譙心欲灑窮途淚。剪紙難招定後魂。還是故鄉風景好。鱸魚葦菜那須論。

贈徐初鄰

千里逢君漢水濱。茲遊汗漫黯傷神。也聞劉表非知己。須識常何能薦人。性到不堪纔是累。交歸于淡始爲真。何妨

共發秋風棹。繡水吳江互問津。

贈錢鑒濤

吟髭撚斷不曾閒。才大如君未可攀。日暮旗亭同一醉。獨將斷句賭雙鬢。

答晟野贈硯

負郭從無二頃田。爲君鸚眼倍淒然。篋中剩有蟾蜍在。獨少名園與米顛。

次韜荒韻贈名閥

此日何來高士風。芒屨竹杖籜冠翁。灌園自得忘機趣。賣卜人誇避世工。詩意半生山曉後。酒魂常喚鳥聲中。襄陽耆舊今誰是。心跡雙清爾略同。

獨酌數杯承韜荒招飲坐定而余已頽然矣作此示之

敢從爛醉覓生涯蕉葉三杯不用賒大得聖賢中妙理夙知南董是方家呼為惡客何曾謬認作公榮尚足誇酒醒二狂君我在一時投分托葶葶

剃頭二首

吾生恰值鼎將遷卅載頭毛未許全四角不妨芟似草中亦何必小於錢偶然梳篦誠為贅時復搔爬也覺更此後蕭蕭人莫笑黑頭搖落到華顛

共遵王制剪鬢鬢數日無端又鬱興一撮尚畱原屬我週遭都去媿逢僧臨風喜試吹毛刃束髮難施縮髻繩最是

青春兒戲日屋簷初覆記吾曾髮覆額為屋簷吾邑方言也

趙星野將舍予於宅西別業移書來訂作此代簡

偶傍郎官借一椽華門甕牖絕堪憐何時復向春風坐不意竟從幽谷遷檢曆便看移寓日空囊免措僦居錢道南推宅誠高誼來往而今更覺便

送韜荒攜家還海寧

同住郎官又數旬攜家先問海昌津何堪久客逢歸棹况復中年別故人鴻耀倡隨時合隱淵由贈處語俱真猶餘漢上題衿作昕夕吟哦不厭頻

移寓示星野

竹舍縱橫八九椽移居仍住郭東偏喜無鶯鴨將鄰惱尚

有琴書倒架遷過客不妨權下榻開樽恰喜餞殘年明朝
莫唱歸來曲媿爾時能與酒錢

方伯張九如先生招余讀書署中喜與鑒濤晨夕賦
示

與爾饑驅各食貧方舟一渡大江津纔爲漢上題襟友同
作桓公入幕人我老咿唔渾似病君司箋答果如神何時
自致青雲裏媿殺儒家席上珍

鑒濤客滇黔時值今義藩索封秦王有十八大臣據
法力爭同日被害後秦晉交兵鑒濤亦在曲靖中
夜譚及不勝慨然爲賦詩二首

安龍駐蹕小朝廷勁節猶能照汗青無復國威銷跋扈敢
因天醉誤調停丹心欲奪真王魄碧血還呼高廟靈誰向
貴陽城下過爲煩椒酒酌離亭

列柵連營曲靖城坐看秦晉畫交兵海桑已向人間變蠻
觸還於蝸角爭共歎蜀中啼杜宇誰從島外哭田橫今逢
四海爲家日不敢中宵聽惡聲

辛亥除夕

此夕何夕序云遷典衣沽酒爲擊鮮一生直可無今歲半
夜不覺過殘年何當飽喫漢陽飯幾時歸種吳江田家公
大笑向予說明年點金還官錢

家曉亭藏東坡真蹟敬題其後

趙宋之際工臨池眉山老坡稱絕竒章法初學顏刑部筆

力遠過楊少師我家曉亭得筆跡卷帙因之生陸離裏以
蜀纈藏什襲神物終當爲護持尋常不肯犯人看恐是紛
綸過眼兒憐我嗜古得其癖展卷再四同嗟咨乍看側理
斷紋起墨瀋透背光琉璃蘭亭繭紙略彷彿越州不得誇
烏絲細看用筆入變化瘦硬天矯非平時公昔論書鄒社
老阿環飛燕須參差波折有時露本色筆端畫出公鬚眉
端重最得大臣體此書足爲人羽儀嗚呼真蹟不易得碑
版至今照四彝君不見桓家寒具油來禽青李同日悲永
寧里中丞相府敗垣零落無人知

贈趙駿求先生

一枝偶借漢江濱種菊栽松稱隱淪拈拂止參無味話閉
門長作在家人半生鴻爪空中影十載龍胡墜下身近與
家君成二老風流來往也前因

初夏與鹽濤對酌

官衙蕭瑟了無聞沽酒猶堪共論文雙眼懶將青玩俗一
樽直舉白浮君雷聲夜送晴川雨日色朝穿鄂渚雲收拾
錦囊應不淺懸知佳句出人羣

七夕後將以試事暫歸江南因事少阻時錢子亦將

還涪潭

共期殘暑買歸舟行止由人復少畱非愛西山常挂頰爲
羈南郡賦登樓多年客况誰青眼一夜鄉心欲白頭摒擋
奚囊詩數帙曾中雲夢未全收

武昌歸舟漫興

兩年江上感韶華。此日辭親去路賒。久住已便音帶楚。暫歸翻覺客爲家。無端引睡拋秋卷。發興看山鬪午茶。只有晨昏關底事。轉蓬應老舊生涯。

堯峰歸舟

蠟屐高低足漸疲。尋幽不覺棹歸遲。分留物色吾何有。領略山光此亦奇。紅葉滿邨疑入畫。黑雲藏雨似催詩。歸途大有餘歡在。更擬湖濱住少時。

書樂天想夫憐斷句後

開元詩數右丞賢。樂府能於近體傳。不是樂天拈出看。無人知是想夫憐。

茗飲歌五首上徐木容先生

活火初燒煙縷颺。午窓恰得一杯嘗。先生自謂羲皇上。更覺其中回味長。

馬乳方傳自上都。纔傾一醖勝醍醐。茶中亦有桑田劫。此日仍宜喚酪奴。

蠟眼旋生幾沸湯。也知結習未能忘。酒仙詞伯堪驅使。只炷茶神一瓣香。

愛品諸泉鑿絕倫。茶香泉冽齒生津。惠山差較中泠近。誰作先生水滸人。

筆牀茶竈老寬閒。桑苧天隨伯仲間。囊底賣文錢尚澀。未堪峒頂買茶山。

鴈字四首

何處秋風送早涼，橫飛數點映斜陽。霜翎欲寫藏真帖，風翮兼摹急就章。看作家雞還似庾，呼爲野鷺卽如王。鈞深法秘君休倚，雲際天然翰墨香。

蟲書鳥跡自紛紛，靜對山頭送鴈羣。試過禪房成梵體，若經香閣儼廻文。影沉水底摹千本，陣散天邊變八分。誰向臨池稱獨步，凌雲健筆總輸君。

羽毛不比墨花鮮，常向秋光兩鬪妍。煙水數行臨短幅，谿山千點寫長箋。縱橫筆法居神品，遊戲天公妙化權。借問阿誰能鑒賞，除非素醉與張顛。

居然翰墨有家風，健翮扶疎信不同。苦欲鈎填翻類拙，縱無波磔也能工。鶯籠道士休忘換，龍跳天門未許雄。若作神仙思羽化，定須字解沒長空。

哭佺弟

憶汝墮地時，歲劫在乙酉。王師初渡江，盡室更奔走。同行畏兒啼，從旁掩其口。兒誠何所知，掩急聲益吼。我母轉加憐，幾棄復縮手。及乎免亂離，愛惜甚瓊玖。稍稍至勝衣，黠癡無不有。漸解覓鳩車，頗知陳瓦狗。兒戲庭除間，輩行共于喁。已壞不復作，此意古人取其氣。真食牛糝未就繩，糾健如走黃犢。映若吹劒首，夫何生不夭。五歲喪我母，吾時雖知悲，哭罷已索糗。女性誠過人，扶牀淚如瀏。時聞呼娘聲，撞曾類杵臼。同屬毛裏人，于女較多負。長者咸歔歔。

童孝今誰偶未幾上家塾肯落諸兄後雜誦數十行發端
 驚談數十二屬今文離奇筆蚴蟻亦能無齟齬氣已壓儕
 偶我親方祿養海外紆若綬水涉彭蠡雄山經大庾陡吏
 民如猿獠鳥言聽難剖有蛇如樹長逢人呼誰某起居一
 不慎魂魄失所主羣蠱恣飛遊殺人在杯酒颶母走天吳
 海鱸大于阜女獨慷慨行厥孚實盈缶一別幾六年頗怪
 參商久我領已生鬢女顏覺微黝相見眼為驚各問無恙
 否女言居海濱五載因踐蹂驕兵脫巾呼城社幾不保蛋
 戶駕大扁乘機乃做擾生黎勇豬突老弱怯干板盤餐薦
 蝦蟆蝮蛇毛以非俗謂此味佳吾見口已嘔終慚玉局翁
 南烹漸能狃以故體獨臞面目甚鰲垢我聞之而悲與女

同穀穀今幸從親歸勸酬敘長幼從此約鍵戶一家互師
 友牆角舊短檠宿火光在牖堂西小茅齋有門已亡牡女
 我哦其中疑義相擊扣誓欲扛龍文慎勿享敝帚女喜微
 言規我善更端誘詩擬箋魚蟲字能辨蚪蚪持之以問世
 謂可出人右青衫不掛身于女何怩怩既復從親宦一官
 屬漢部我挈蓬頭兒女攜椎髻婦疑獄佐平亭箋答極搜
 討我親少強直立志在不苟偶失上官意宵小互相嗾羣
 撓蔣沈清頻挈子賤肘盜跖目為廉夷光變成醜危法既
 巧中伏機復陰掎如雉方罹羅如魚思脫筍我親識義命
 非意理遣受虎豹屯九關修門不可叩而女獨咆哮憤激
 情所茂歐刀伏闕下死終不反咎期我為駟蛩憂心共如

擣會事亦漸解天幸固甚厚長卿體素羸消中疾已舊况
當在莒時失意事八九若憂能傷人此子不復壽執手臨
路衢老淚落尊由我疾視女歸女病已不起寒熱遞相攻
嘔血積數斗生同長吉年鬼伯已相趣彌留念我親在遠
安和否寧知犀角子薤露歌牆輒鄧攸竟無兒天道誠難
考靈牀火青熒誰與奠蔬菽平生所丹黃敗帙已覆瓿緬
思風雨夜對牀共相守姜被忍獨寒哀些不堪道

鑿濤有還吳之約詩以招之

武塘秋水白於銀衣帶吳江正比鄰何日遲君賦歸棹筆
牀茶竈共相親

蕪湖

關吏猙獰去復還客囊顛倒在江船書籤莫怪無人檢文
字何曾值一錢

晚次田家鎮

朝辭湓口日熹微帆指蘄陽背落暉山勢似高回鴈嶺潮
痕初沒釣魚磯拜風江豕衝流上唼食神鴉貼水飛且復
泊船成一宿浮萍蹤跡幾時歸

江行即事

倦倚船窓過大通午餘天氣尚曛曠前邨山暝龍拖雨隔
浦波翻豕拜風客路頻經猶說險浮生到此得無窮忽思
宦海魂驚處一枕安眠高浪中

癸丑初夏至漢陽適家君移寓別山之陽背城面江

有少陵草堂之勝因賦長句志之

人言此地背城隈絕似成都錦里來山徑也曾緣客掃柴
門今亦逐江開雖無酒伴從鄰覓尚有園官送菜回春興
楚歸凡幾首

近家君以楚歸名詩集

浣花風景少陵才

江

倦遊重寓漢陽城來往真如一葉輕斜峙雙磯波蕩激夾
江兩郡勢崢嶸岷山來脉源真遠岫冢旁流派亦清猶有
前朝興廢跡候人天塹是虛名

武昌寄錢鑿濤涪潭四首

昔作武昌客秋深話故園君思歸貴竹我亦返吳門贈別
詩曾和加餐字尚存重來舊遊地梁月幾飛翻

子有居夸志入山何復深兒能解蠻語婢喜帶華音園蒔
無名藥林鳴未識禽奚囊增幾帙定寫入高吟

此地曾為播雲山實畏途鄉應多瘴霧箬欲蔓平蕪全蜀
關門戶前朝入版圖德馨君自重何必語姬隅

文人俱不達命果被才憎僂耳畱坡老成都滯少陵蝮蛇
長似樹山鬼夜吹燈亦復同搖落蠻天避繳矰

顧明曾自燕至鄂移寓大別興國山房

偶從西笑泛江槎重寓禪房卧曉霞厭聽方言咻鄂渚喜
翻梵夾呪毘耶看山景盡供詩料賣賦錢都付酒家京雒
緇塵楚狂態竝堪吟醉作生涯

示僮二首

判年畱鄂渚惟女久相隨此亦爲人子吾猶似客兒觸屏
驚欲醒懷刺諾偏遲僮約應重訂王褒是我師
縱使人奴賤還須分寸功駝曾書子厚鬚亦述盧仝鞭朴
原難廢寬嚴在得中相依頗姑息誤汝阿家翁

送友入蜀

天下崎嶇路何爲君忽行峽流巴字水山接錦官城樹底
鷲猿掛雲中聽鴈聲依依君莫忘此別最關情

送子箕王明府江陵對簿

臨岐執手重淒其萋斐情深在此時天寶才人皆欲殺寢
丘廉吏果難爲憑誰與乞鄰家火有客能書牘背辭最是
仲宣文藻好登樓賦就少人知

與明曾話舊有感

劫轉桑田風景殊班荆重話楚山隅濤江碧血原難化葑
郭青檀久已無屈姊若歸平可詈山公猶在紹何孤請看
直筆貽青史生氣英英儼畫圖

寄韜荒粵東

萬里番禺道千金陸賈裝歌驪思往日賓鴈又他鄉秋月
當梁白寒葭帶露蒼倦遊殊楚粵何日共壺觴

送沔陽州守朱我嘉遣戍晉陽六首

亦知終不免弊薶赴修門道有豺狼卧關多虎豹蹲豈能
逃漢法何必弔湘魂諸子京華貴誰人與達冤
公私逋累苦官罷益嚴催門踵追呼吏家無逃債臺錢囊

看愈澀塵甑積難開此况曾相似因君感一回
白辭誠何罪青蠅竟屢催郎官星欲黯司寇法難恢軍旅
知才敏詩書實禍胎客中須自遣失馬未為災

大典今如此才高禍未紓已登司馬籍竟落考功書去國
名難潔還家夢亦虛何人送臨賀相對轉欷歔

簿責寧難辨官卑敢論情何當及寬法幾不免餘生臣罪
應誅殛君恩自聖明莫將衰颯意寫作不平鳴

尚有家夫子同時罷漢川往來惟二妙

謂先生及李霞裳明府也

急難共

三年生計差能穩寒灰總不燃宦途多反覆歸隱似登仙

漢上旅懷

三間茅屋枕江濱卧榻蕭疎不受塵卯酒數杯常中聖午

餐一盞便留賓翻飛語燕何知倦沈沈

青錢理歸棹那堪長作漢陽人

寄題潘六奇寓齋

鐵門關下徑微斜小築茅齋老歲華曾理釣絲添水檻偶

栽松樹似山家篋中有句酬青玉囊底無錢掛畫叉我亦

倦遊同潦倒兩回空泛漢江槎

有感

年來真與世情疎無事衡門喜晏如但遇惡賓還譙讓每

逢俗物發軒渠茶槍懶置新營陣酒券賒鈔未讀書信美

他鄉非所願何時歸去帶經鋤

漢寓再寄韜荒

楚天渺渺正愁予，懶性還依水竹居。此日忍拋張翰鱸，兩
年真食武昌魚。秋風時捲江邊屋，今雨誰來花外車。從古
窮愁多著述，媿無佳句突黃初。

弦月

半規猶未皎，薄暮已橫空。圓影為蟊蝕，清光被桂蒙。雲端
飛破鏡，天道果張弓。三五何難遇，中商便不同。

九月明旨招飲大別山房

禪房洗茗更盪桓，日午登臨興未闌。故里菊花空自放，他
鄉杯酒數君寬。人情方信南中苦，佳節纔知好會難。此後
年年成一笑，茱萸囊了不須看。

聞有粵籓之撤

乞歸有表許朝參，坐鎮誰成鼎足三。儘有陳豨王代北，可
無汲黯寢淮南。釀成大尾真難掉，殺盡雄風果不堪。竊喜
家君歸策穩，主恩今日是抽簪。

初冬買舟南歸喜極有作呈家君

數年萼菜想江東，尚喜還家有徑通。粟貸監河甦轍涸，驂
遺越石慰途窮。謂方伯張九如郡
侯紀子湘兩先生當年幾欲歸司敗，此日何妨
殿考功。檢點客裝殊不薄，滿船明月袖清風。

余自去年出京口溯長江而上至漢陽復順流而下

風雨晦明頗盡其變，因敘之以志江行之美焉。

天一乃生水，水實五行首。在天月為水之精，在地山作水
之母。嗚呼濁河之源，真不同崑崙上與銀河通。岷山萬里

柳塘詩集卷二
最委折亦有鬼神異物張其雄隘如千江爭一門水勢倒
下愁江翻曠如平時渺無際波濤萬頃驚心魂如山頂
懸飛瀑水與日光相吐吞清如燃犀照水底蟲魚百怪驚
欲起險如罡風吹雨立長鯨跳躍老龍喜須臾江山曉開
霽鮫人夜半將宅徙奇如洶湧江驟漲百丈牽船不肯上
偶爾一縱即少逸長年三老皆惆悵或時渾淪涵太虛或
時愴怳難爲狀吁嗟此遊殊未竟已覺宵次俱瑩映何不
穿峽窮其源盡取江山付吟詠

蕪湖易小艇下京口示同舟人

今日更同舟多君意氣投醪錢邀每醉減米惠曾稠客艇
如傳舍蕭齋似舵樓張帆風覺穩外此更何求

采石

采石臨江險東南形勝間金陵爲右辭姑熟當雄關水落
山根出祠荒薛蘼斑感今兼弔昔一笑解愁顏

泊木排灣遇風

此日纔移棹風濤勢已成潮來孟湖口江盡潤州城五兩
吹難定三篙漲未平頻年曾作客見慣也還驚

柳塘詩集卷三

詩五十二首

茅齋

小築茅齋八九椽
紙窗木榻故依然
入門蛛吐層層網
拂壁蝸盤曲曲涎
汲水便澆新買硯
臨書仍倚舊藏氊
幾回獨坐真堪味
即此還家已是仙

贈徐木容先生

貧老誰能遣
先生獨不難
身今猶矍鑠
足尚未蹒跚
易論年年注
茶經日日看
眼前無俗物
心地此爲寬

讀趙后外傳

禍水纔傾炎德衰
趙家姊妹擅蛾眉
昭陽無限繁華夢
消

盡樊姬擁髻時

題畫

疎桐密竹日華侵一榻橫陳倚翠陰手內愛翻無字卷指頭思撥沒絃琴

哭金三弟輔年追悼授西大兄

伯氏今何在因君重復悲高堂雙涕淚長夜一墳荒墓草嗟經宿庭芝忍盡萎斯人俱短命天道果誰知

題卜舜年畫

爛溪卜生常任達一生落魄酒中活每攜東絹寫淋漓畫得醉意筆超越襄陽老米世稱賢山水彷彿傳生顛迂絕雲林癡子久能于紙上生雲煙顛迂癡從毫端發顛倒崑崙與溟渤生也以酒而得之能事于今未衰歇曾為我家寫竹石拂拭常掛東齋壁逸致翩然如對生蕭瑟秋山在几席即今生已不可作鄭公粉繪都零落海桑塵劫幾收藏留得殘山與斷壑當時促迫頗矜重醉餘揮灑筆猶凍安得佳醞千百甌生潤君筆死作供也是酒人也畫史醉態依稀在筆底絹素拂拂雲蒼茫生在其中應不死

趙承旨畫馬

魏公畫馬不畫肉下筆往往超凡俗紫毫躍出生龍駒耳批秋竹蹄削玉疑公便是房星精窮彼殊相為寫生或嘶或齧妙點簇意態飛動真難名權奇駿骨應如此牝牡之外有精理傳神全在阿堵中并刀剪得渥洼水鑒賞家誰

為第一武子才情道林佛空負千秋馬癖名惜哉不見公
神筆古來曹霸推能品墨花散作天閑錦今日誰藏九馬
圖尚惜將軍真坎壤何如公老值承明父子各擅文章名
但將餘綺寫神駿已覺絹素留芳聲君不見夾馬營中騰
真龍其餘凡馬皆羣雄秀邸王孫亦龍種英姿颯爽原家
風錢塘王氣一朝微異代遭逢願更違自憐不及畫中骨
輕向燕京草上飛

倪雲林畫霜柯竹石

錫山老迂癖嗜古書畫親題甲乙部好事推為鑒賞家收
藏便作圖書府清閔閣中盛英傑彷彿阿瑛與老鐵興酣
常自遣霜毫秋江落葉寒山雪老幹紛披只數筆霜根皴
得崩崖石籜龍風吹疑有聲意到筆隨半無墨卷首五十
六箇字王維詩中寫畫意老迂唱之諸子酬留與後來為
欵識憶昔東坡富才藻曾寫此圖贈耘老囑添丁長付渠
藏便當看作傳家寶我讀東坡文不見東坡畫雙荷收掌
復何如恐隨時代同遷化我今觀畫復讀詩想見解衣盤
礴時三百餘年遺跡在天機一片果誰知

平山堂詩呈憲副金公

江東資重地淮右數名都牛斗分星野山川傍海隅水經
源委折澤國賦膏腴郡昔饒鹽筴官為領灌輸驛樓迎過
節津吏報銜鱸瓊樹何年種楊花糝徑鋪三千紅粉麗廿
四畫橋殊騎鶴疑仙侶吹簫似彼姝幔亭張水戲燈市潑

寒胡共指繁華地誰將雨露濡史書還約略心版尚躊躇
汴宋當中葉廬陵產大儒金門羣射策史局獨操觚頻給
蘭臺札常乘內廐駒夜分書外制曉仗伏青蒲始謫夷陵
令中遷郡國符吏情殊澹蕩膏澤勝醍醐陵號何嫌廣城
名豈復蕪擇幽教夙駕選勝許晨趨地脉通巴蜀岡形甚
鬱孤牛鳴離郭近龍氣抱山紆縱廣纔方幅周遭近一區
前榮臨敞豁後寢避甌臯門引邗溝水潮通甍社湖琴樽
留宴息賓客踏街衢衣解從盤礴形忘任笑呼子翻松下
局矢中竹間壺一斗愁如掃連盆喝即盧誰知太守樂孰
謂醉翁迂在昔堪師表於今復楷模爲郎殊蘊藉秉哲號
魁梧乞郡辭天闕專城協廟謨汝南思茂憩江表慰來蘇
高寶衝難築黃淮決欲枯波臣嗟助虐赤子坐何辜枉復
沉圭璧空勞掌澤虞懇蠲漁戶稅力免火田租目擊流民
慘親爲鄭俠圖丁男甦轉徙亥老免泥塗殺氣纏滇蜀妖
星掃越吳索鈴朝幾撼羽檄夜還驅廷議符房瑄軍容孰
亞夫郵亭抄白飯傳舍飼青芻頃刻徵千騎咄嗟辦百須
六時忘餐食一昔白頭鬚尚欲尋休暇依然問首途留連
貪勝槩灑掃闢行廚旋折初秋菖兼簪九日萸風流當代
少文采昔人俱大考推高等山公詎矯誣佇看風紀地更
與聖賢徒

村居雜興五首

此地梅塘近楓江西復西有園堪小摘無事合幽棲書蠹

生新帙牆蝸漫舊題細爲推物理得喪也應齊
頗愛吾宗樸週遭聚一村巢鳥飛引子庭竹老生孫峒頂
茶親焙牆頭酒過渾相邀無俗物時肯欵柴門
性頗耽幽癖鄉居最覺便小橋敲尚穩雜樹古皆圓種藥
兩三畝誅茅八九椽有時無所事把釣過前川
偶然成小築意愜頗飛翻棗熟從鄰撲松高許客論短章
渾漫興極目不離村幽意還能用羲皇爾自尊
褊性誰能合幽居長任真飯寧留俗客坐獨對賢人蛙吹
何嫌聒臬鳴懶復嗔但期約鄰父同去采龜蓴

懷沈晉公表兄受公表弟

伊人宛在水中央歲臘常過高柳堂池畔憶同牽竹馬齋
頭曾共賭羅囊歡娛不覺成鴻影貧賤真堪作鴈行意欲
與君尋一醉黃花紫蟹酒瓶香

書大家詩集後三首

紅豆山莊拂岫青客來猶見問竒亭當年黨論推尊宿近
日騷壇尚典刑不死擬將成漢史孤生忍獨守玄經延登
舊恨君休說日斷台階兩兩星

夢回龍尾醒猶殘重入春明興轉闌宣去可能如老鐵放
歸未許戴黃冠悲歌自覺高官誤讀史誰知名士難今日

九泉逢故友西臺涕淚幾時乾

先世父扶九送司成北上詩有若使啼鵲真帶血西臺一曲故人情之句

少年起草漢明光先後才名兩擅場物論一時稱鮑謝世
情新咏贅山王何妨公等爲龍尾寧少詞人與雁行掩卷

不禁三歎息漫論詩律費商量

甲寅雜感四首

蘋洲嘯聚阻巉巖越境縱橫未易芟東老何須防鬼瞰西鄰未足飽渠饞軍中橐滿牢搜物麾下人多扳授銜從此吾鄉稱樂土穩尋黃獨把長鑱

閩海烽煙撼玉除三衢寧作國儲胥八旂半發京營卒雙羽新翻國語書江邑衝疲愁置驛燕都迢遞走飛車不堪更急催科吏一月三回過敝廬

軍符新調羽林兵府帖嚴催馳道成雨作濘泥騎馬滑水衝斷岸搭橋行便簽亥老充堤長更稅丁錢甃石平媿我有田無負郭也因工竣樂春耕

廷議真符次律翁屏藩臨遣鎮江東急需特給封椿庫密旨親承長樂宮雲氣遙迎天子瑞風聲更識大王雄可憐劇孟無聊賴未任條侯物色中

乙卯午日聞婦弟沈禹九失子寄慰

刻蒲懸艾酒初闌信到為君飲不歡久向謝庭誇寶樹忽驚楚澤隕芳蘭中年失子真堪痛此後添丁未必難洗盞復停思子夏眼枯那得愛河乾

表姪周逸超省試得而復失寄慰

偶因點畫誤遺珠疎拙非關不好筭聊把塞翁來慰藉若

逢路鬼任揶揄冲飛且待三年後好采還能五白無

好采來五白成一呼我似雲英同未嫁當盧可勝酒家胡

山谷詩云功名

展周叔宗真蹟寄禹九

幾幅烏絲信手翻
臨書終自媿專門
翩翩體勢看波折
綽約風神識漏痕
縱使散僧能入聖
莫教無佛便稱尊
此中得力真難到
春蚓秋蛇敢漫論

夏日偶成

坐覺林塘靜悠然
一草亭水流天目
白雨洗洞庭青竹裏
歌宜放松間酒易醒
喜無襪襪子觸熱叩柴扃

嬌兒

嬌兒生數歲嬉笑見天真
惡卧將衾裂牽衣索抱頻
嘔啞今若此老大可如人
一種關情處含飴娛我親

七夕

銀漢機杼罷鍼樓
瓜果陳靈原歸舊匹巧乞與何人鵲作
天邊駕槎通閤道津相逢即相別
此際黯傷神

丙辰苦雨五首

沉沉疎復密颯颯斷還連
堆竈藏何處輕雷屬卯前
苔衣緣砌潤水面濺珠圓
絕似雲門日晴空吼瀑泉

昨歲頻傷水今春不肯晴
雷從地底出雲向嶺邊生
牛馬真難辨蛟龍苦欲爭
衾裯與斗米往事重關情

耳畔聽真厭簷前滴不休
漲痕寧似昨塌井不須秋
穴蟻緣牆避游魚入檻浮
出門恐泥濘三月此淹留

歲計當蕭索農夫久歎嗟
溪添三尺水村踏大棚車
已見牆生菌先憂麥少花
豚蹄緣底事此願覺今奢

玄冥愁宜罪驕陰勢尚尊何當錯昏晝不復辨川原久訝
天為漏真如海欲翻誰能解雲霧萬里日光溫

晚晴

自此應無雨今朝遇晚晴游魚吹沫少歸鳥帶雲輕氣為
飛虹燕山因銜日晶家家典衣釧酌酒賀春耕

午日觀競渡

朱明當仲夏令節是端陽我亦衣懸綵人俱額抹黃迎神
開雨霧招屈渡沅湘亭午纔移棹傾城盡日狂

暑夜

火雲猶未斂纖月已微升蝙蝠飛真厭蒼蠅聚可憎清心
消暑喝散步解炎蒸竟夕還揮汗層冰踏未能

避兵

江關當孔道三歲厭旌旗屋似牽船便橋唯略約宜塔鈴
晴自語驛路雨還敲民力東南盡當途知不知

哭計甫草先生

孝廉吾執友一旦驚淪沒當代著作手風流頓衰歇憶昔
君少年英氣已勃宰日讀徑寸書簡編恣考覈洋纒數千

言小儒為咋舌尊公天下才所交皆俊傑同時東湖翁

也誓將國恥刷命為君之師切廟在名節鄴侯萬卷書

織悉皆囊括君才誠縱橫寧足當穿穴獨指忠孝字孤光

終不滅我家老世父文壇持玉鉞常操月旦評初不差毫

髮忽於同人中多君調通脫我姊方及笄許奉君巾櫛快

壻未乘龍佳人已長逝君持婦翁手頓足聲嗚咽重下玉

鏡臺我猶忝戚末

今張夫人先太孺人姪也

是時天步艱邊境肆盜竊君

獨抱孤憤中夜腸內熱上策不見收兒童竟塗抹馴致甲

申間天地遂崩裂 真人起沙漠神武恆不殺揚旗定燕

秦指揮蕩吳越一旅興東吳

謂楊菴

螳臂當車轍身死足千

秋其人今尚活君時方奉諱家國禍竝烈遂棄頭上巾長

任阮生達賣藥混里閭長齋佞繡佛兩浙賢有司敦逼無

虛月君乃返初服欲行尚蹙蹙試輒在高等頭角看再凸

年猶終賈儔名與老蒼埒辛卯誤副車甲午貢天闕六館

諸生徒顧視氣益奪山陰胡尚書忘分願交結邕求識少

凌此足慰飢渴折簡持致君臯比坐中設君大放厥辭學

海波瀾濶賢書魁北闈不復煩抱石衡文實濫觴真贗互

採掇 至尊赫斯怒諸司盡駢跪請試殿廷間臨軒更甄

別學士如堵牆喜君筆奇絕能感帝王尊霜蹄未爲蹶扃

酒賜天廚蘭臺給御札金門重題名姓氏果首拔大壑縱

巨魚橫空摩健鶻變偶終成奇南宮試再別君有生龍駒

啼聲識英物三歲氣食牛其才實超軼宅相成陽元舅甥

別優劣讀書得大意學禮陋綿蕝探討千聖源芻狗百家

說理學辨異同文章恥抄撮正襟坐匡牀恍與大道接遠

搜象山微近得陽明訣我嘗獻芻蕘恐墮苦空窟亦復首

肯之志在斬藤葛好惡大略同所異勇與怯天道何無知

斯人竟天折子雲哭童烏淚盡繼以血遂築思子亭以筮

巫陽魄非熊或再世此理終恍惚我勸君節哀胸襟令軒
豁次公如季方九畹蘭已茁差足慰目前阿奴正飄突君
既失諍子無心售駿骨世亦旋棄君生計轉踈拙牛車誤
公家一糶錮英杰壯年被放廢怪事叫咄咄五嶽起方寸
形貌漸萎茶思欲叫帝閭修門甚迢遞况有虎與豹所言
竟誰察故人多達官修刺每上謁衫段乞到公補綻在短
褐放蕩魯宋燕意氣益騷屑常登吹臺上悲歌激林樾復
凌泰岱巔夜半看日出時負古錦囊驢背灞橋雪龍門良
史才遨遊得筆法大手張燕公悽惋江山力君薄遊中原
形勝略髣髴銳意於詩文逸氣亦迸發老境體乃適晚節
律轉密意每在筆先興或生象外辦香屬廬陵鴻寶人未
識吾吳有鈍翁魁梧真秉哲于今少許可頗與君莫逆上
下近代間議論常往復弇州才雖夸不若震川潔掌故擅
升菴魯魚多未核夫豈學蚍蜉雷同語羞聒文字好譏彈
一一慎剖析誰復定君文農部乃質的我生最愚魯記十
遺七八時放蒼蠅聲咀嚙少妥帖君顧謂孺子汝舅堪大
敵謬許在末行吾私終難愜去冬指阿蒙謂可名流頡詩
格費推敲詞場賴君挈方期享大年共了名山業云何僅
下壽鬼伯促太疾垂白北堂萱一慟五內割弱子過時哀
氣息尚惓惓病婦骨支牀撫棺有愛妾誰當嫁阿鷺身後
更悽切吾黨失典刑親串咸哀感憶過黃公壚忍聽山陽
笛我思一慰君長夜何岑寂天地爲逆旅萬物皆奄息生

寄死如歸此未為蹉跌騎鯨倘往來蒼茫杳難覓

九日

重九人俱愛三杯客解愁囊菜為令節側帽乃名流尚喜
成今笑何須記昔遊干戈方楚越良會足淹留

寒

已過一陽月愁為卒歲人綿須裝後煖衾是昔年初漸覺
膚生粟何妨手不龜春風開墻戶吾亦喜歌函

喜雪

竊喜今年雪俱從至後來寒司玄冥令花逐臘梅開壓樹
枝偏重縈空舞却回穰穰如有驗勸女一深杯

丙辰除夕

一生幾荒落過盡第三回此夕真箇惜少年難再老
思食蔗歲失厭銜杯兒戲宛如昨春光只時能

聞雷

臘自窮冬盡春從歲首催凍雲難作雨除夕乃聞雷梅蕊
枝頭綻蟲蛇地底回如何元旦日依舊雪皚皚

鴛湖宿鍾宣遠先生齋頭

吾父平生友鴛湖情最親晨星寧有幾今雨復何人剪韭
招邀切荷衣記憶真歲寒惟二老相望鬢如銀

寓香露菴示晉上人

蒼松開古徑修竹倚枯藤花供樓頭佛鐘清定後僧社須
參慧遠法許續盧能五乳峰前老

內有懸山影堂龍淵有一燈

香露菴供佛梅

索笑巡簷日幾回，滿園生意未須催。
一枝折取樓頭供，不要空王法力開。

田家二首

布穀催春種，家家望有年。竟無牛代力，例不火燒田。
肩水羣兒弱，分秧大婦便。辛勤從此始，手足敢辭胼。

官稅從來急，生涯近轉微。春光當熟食，風煖典寒衣。
糠粃何曾飽，豚蹄且復祈。門東羣索飯，叫怒苦號饑。

王師

南越新收復，江東少戰爭。雞蟲誰得失，蠻觸爾縱橫。
吏上催科考，官嚴轉粟程。無端悲喜集，何日竟休兵。

贈朱長孺先生

左思昔著述，不憚歲月長。苦心事研討，斐然自成章。
門庭懸紙筆，斗室生輝光。當其未脫稿，目為中原饒。
一朝睹傑作，璀璨騰縹緗。山經及地志，行間細鋪揚。
結構既精密，體勢復汪洋。所以賦成後，輟簡驚老蒼。
我朱先生腹，笥堪頡頏少。工舉子業，有聲振膠庠。
晚乃棄之去，獨以古自將。鄴侯架萬卷，觸手皆丹青。
貫穿得理法，緯史而經經。其餘諸子家，亦俱咀其英。
讀書有根柢，今古可下上。故其所撰述，每見推大方。
嗚呼虞山翁，詩史之津梁。指摘諸注家，援引多未當。
遂使萬丈燄，銷鑠不復明。先生謂虞山，齡也不自量。
燭火雖云微，曾不讓太陽。

先生序中以太陽喻虞山

立論不苟，同足見

筆力強可解不可解大義微而彰至今是書出終不妨兩
行更有玉溪生艷體推擅場能傾羣言液兼漱六藝芳餘
波皆綺麗其旨終微茫推見彼至隱音節爲激昂直令千
載上義山可不亡老篤嗜經術一編笑窮忙人生不通經

有如瞽失相論詩鄙夾漈小序尊卜商家尺定鐘律

序中以
小序爲

詩之

家尺厥功良難忘典謨藏魯壁絲竹響孔堂宋儒稍躋駁尋

繹心俵俵學術禍天下無乃此濫觴不可不是正幽渺其

張皇春秋成倚閣禪野羣披猖臆見務穿穴何由窺素王

大官命左氏賣餅訾公羊老抱杜預癖史學開榛荒庶幾

宣聖道因之而大昌炳然如日星中天吐光芒阿蒙生晚

出幸得同一鄉蠟屐時造訪妙論針膏盲學殖媿荒落不

若亡羊撼開卷謬亥豕識字譌偏傍少陵年九齡有作成

一囊阿宜能力學一月讀一箱而我獨固陋無物可撐腸

忽遇大作手雜誦聲雷碾采撫包二百考核窮三倉如在

羣玉府觸目皆琳琅又如觀武庫矛戟森開張恍疑入宗

廟遽豆登大房斯須奏雅樂磬管聲鏘鏘百官皆在列劔

珮羣趨蹌殘膏活儉腹尚足資騰驤如度越山海茲爲之

梯航席門在陋巷老屋枕荒江不買陽羨田殊少成都桑

從無外物牽甘隱希蒙莊獨有不平鳴老筆益蒼涼晚炊

常餐蕨宿火時燃糠展我舊著書爛然堆匡牀顧猥誦拙

句天矯超尋常期我不朽事大業先天壤經生死章句實

難副所望龍文鼎百斛輕才詎能扛深恐負獎借終夜常

彷徨

遣興二首

小山有叢桂。燦燦色若霞。托根在何處。廣寒乃其家。吳剛謬持斧。斫此金粟芽。一子落吾圃。十年枝交加。蓐收忽司令。開遍黃金花。天香發秋光。幽韻刊春葩。

嶧陽有孤桐。危枝高百尺。斲之爲琴材。掛我齋中壁。弦以朱絲繩。徽以黃金屑。一彈復再鼓。其音正疎越。能使江水清。足令山月白。不遇賞心人。日夕自怡悅。

柳塘詩集卷三

柳塘詩集卷四

詩五十二首

丁巳上巳日清明

歲律同元巳。清明及季春。羽觴修禊事。飛蓋集嘉賓。杏粥和餚冷。榆錢賜火新。天公真省事。并作一良辰。

春深

忽忽春深後。難忘比日歡。涼巾嘗昔酒。御袷敵輕寒。風識鳥巢穩。晴催燕壘乾。荒村饒景物。粗覺一枝安。

賦得春星帶草堂

春夜杓東指。嚴城硯北居。參疑橫屋角。斗已轉階除。半入明河挂。翻因近月疎。細看佳句法。吾亦愛吾廬。

家孟自澤州至得學人張從典書却寄二首

伯氏高都至緘封有數行剪蔬爲地主贈策趣行裝鳥道
高難越鵠原急欲翔書中推分意每飯不能忘

江夏同晨夕今朝晉與吳君將變頭角我欲白髭鬚老馬
途荒忽征鴻信有無他鄉分手處回憶幾踟躕

喬雲霍公令吳江憲政在民于其喪歸詩以送之二

首

今日時方訕吏廉爲果難頻遭長官罵只得細民歡有甑
塵封滿無錢囊忍看銘旌出江道童孺涕闌干

昨忽聞家諱今何復岱遊吳民真不祿昭代失賢侯樂社
精靈在桐鄉惠愛留循良應傳入治行可搜求

遊淨慈寺四首

共指南屏路依微見遠村鐘聲初出寺塔影正當門佛法
忘言貴真人無位尊但知崇梵宇此意復誰論

大有幽人趣何須問苦空萍依池水定竹引井泉通山氣
爲雲白湖光漾日紅盡將閒曠意寫入錦囊中

若論虛無裏寧無便闕焉境能空所有心許悟諸禪愧我
攢眉客遲君蓋頂緣從奴解來意施與看囊錢答寺僧乞施

紺宇疑無地禪關別有天應真僧五百妙法界三千額尚
傳南渡人猶話濟顛只資象教力未免劫灰燃

湖心亭放生池

觀魚興不淺濠上許同招棹入空明境行經宛轉橋沫因

吞餌大尾為避人跳於物宜歌雅靈臺事已遥

遊茗中法華寺次坡公韻

精藍恍在蓮花界縛律談宗總一派我愛蒼松夾道生脚
力輕健行覺快登頓還凌最上頭萬頃湖光見泝泮盪胸
生雲未為奇眼底乾坤粟粒隘松枝豎義問何人間有舌
根長不壞形骸消毀理之常伎倆狡獪焉足怪但貪名勝
恣幽尋兼採藥物供蒸爨遊罷思將姓字題字體愧未成
倒薤吁嗟便腹貯天真慎勿輕為世所械峨眉嵩少任君
行石門何事將辭疥殿辭有宋石門
畫峨眉嵩少圖不然咫尺亦難過六翮縱
長人欲鍛歸和坡韻寧謂工但免遊此逋詩債

龔惕持檢討乞歸粵東道阻不果近聞其在崑山作

詩寄之敘舊述懷凡六十二韻

萬里羅浮客三年秘閣員麒麟行地上鵬鶚下天邊學擅
扶風富鞭宜士雅先粵中為領袖省試早孤騫價貴衡陽
紙名高鄴下篇一鳴鷲姓氏十上幾述遭玉為他山潔金
因百鍊堅久淹疑老宿獲雋尚英年外吏循資格詞臣不
注銓臨軒除館職給札纂長編辭乃圖書府奎當日月躔
是非關史局獻替在 經筵 帝迓同時者公今果在馬
清書翻較熟國語譯來全夙駕思遊豫觀荷為吉蠲瀛洲
山突兀海子水滌漩 詔令蓬萊吏同登閭苑巔大官分
馬乳寶鼎熬龍涎曉入隨 天仗宵牽載月船恩難言感
激身喜荷陶甄不料萌芽蘖何知禍蔓延攬槍橫楚蜀枉

矢燭閩滇末大真難掉風雄未易遷孰為家令策肯用繞
朝鞭首尾踰三載干戈遍八埏方隅悲隕突煩費苦牽連
鬼妾從人占征魂計日還輸邊徒藉式籌國未師然子灑
憂時淚誰將撥亂肩空餘書乘博辜負腹經便旋引文園
疾還尋荔浦田尉佗輕背漢坡老不歸川西笑何堪問東
山許暫眠莫傷秋月候共趁晚香天尚憶家夫子曾經佐
化權參苓無俗物桃李發孤妍獄識為龍氣亭知作笛椽
逮辭瓊島綬兩試武城絃並枉嘉賓重何伸地主虔悲歡
談往昔師弟各洒漣杯餞豐江水魚懸漢上鱗分張頻屬
望三黜坐何愆李蔡真中下王尊乍佞賢典衣充旅食減
產抵官錢去國名難潔還家夢屢牽身幾喂乳虎肉盡飽
飢鳶公論為昭雪爰書未洗滯監河能貸粟賈傅平沉淵
岑寂聞君第沈綿夙病痊門牆增氣象衣鉢媿流傳賤子
頻頭責先生望眼穿此身徒老大親髮且華顛昔似窮林
雉今如脫殼蟬鬚眉還歷落行止不拘攣秋宅塘南首張
墩漾北偏漁樵供指使書畫足回沿橘柚成園圃陂池小
幅幘常將雙屐蠟竟策短轆旋冬煮銀絲鱠春叅玉版禪
寧甘守我拙未敢逐人羶久矣思遲駕何時得扣舷平生
骯髒意獨受故人憐

姑蘇楊柳枝詞五首和汪鈍翁先生

無限春光要細論春人春日古吳門饒他鬱鬱園中柳已
被風吹廿二番

柳塘詩集卷四
春情爭似柳條長。三月花飛易斷腸。湖浦天桃紅勝錦。倩
他輕薄配顛狂。

中車曉出闔閭城。盡向橫塘道上行。處處綠陰鋪妓席。歌
喉一髮是藏鶯。

觀音山轎盪湖船費盡詩家買酒錢。小雨最宜寒食後。堤
邊須得萬條煙。

漢苑移來此地宜。任他眼起總低垂。小蠻舞罷嬌無力。消
得香山一首詞。

鈍翁自題柳枝詞後有夢中錦段已無多為儂細細
寫蠅頭之句再和二首

文如翻水世誰倫。綺語能生岸上春。若使江郎早才盡。景

陽錦段與何人

湜籍纔能張此軍。未堪沽酒便論文。韓家阿買差相似。肯
為先生寫八分。

花遊曲次鐵崖韻

水光山色浮空濛。遊人雜遝生春風。美人一生活花裏。玉
簫金管在湖水。畫舫中開白版門。日光照耀芙蓉鬢。昨宵
曾躡武丘步。金精共指家王墓。今朝放棹石湖來。雙手連
擲蓮花杯酒兵。纔罷鬪茗碗。北曲鯤絃南曲板。玉蟾東挂
金烏西。銀鈎蜿蜒將名題。歸來簫倚雙成使。不數揚州橋
廿四袖中各出鸞溪箋。分和老鐵花遊篇。

渡湖留宿鈍翁先生堯峰山閣二首

每作渡湖計今朝一棹橫榜人嫌路僻山叟引船行定許
茫然喜深慚屣倒迎更闌重秉燭相對話平生
函丈違來久談深欲二更攤書頻拭汗敲句忘驅蟲家釀
傾還細山蔬煮帶生論文吾豈敢佳味有餘清

題董庭聞扇頭並肩美人

曲曲蛾眉點點脣內人妝束最停勻問誰識得凭肩意阿
堵能傳兩處神

書永和宮詞後

軟紅塵土接承明驢背詩家太瘦生舊事不堪重下筆莫
將天寶比崇禎

邑志二首

史家凡例問何如邑乘紛紛續莫徐若使蒙求為腹笥何
妨操筆便成書
大手操觚未易工等閒輕寄兔園翁惡詩穢史俱攬入藏
拙無如付祝融

和范石湖臘月村田樂府十首

石湖詩采入邑志遺俗至今有存者有廢者有名
存而失其意者君子可以觀世變焉因悉次其韻
以俟采風者

冬春行

畝收數鍾農倍利六旬富翁憂少米
近有六十日財主之語強半贖典完
官糧畸零猶自堆平地簸揚盡餘糝與糠軋輾還須數刻

忙質鬆落榭粒不長米春斷為落
榭方言也亦如脫粟無晶光依然縛
 困為蓋藏蒸浮不覺冬春香但使棘喉飽便足敢望炊珠
 兼饌玉不識能供幾月糧瓶罄愁難接夏熟門東索飯休
 咨嗟五升日糴人誰賒歲晚逋累紛如麻縱有米歸子母
 家

燈市行

爆竹連聲喧墜地薄俗元宵作燈戲初八參星並月高早
 知此夕燈成市諺云初八夜裏有參
星月半夜裏有紅燈教魚山幾樹真精工置嶺標
 峰路不窮中撒亂星數百點一一蕩漾生春風連宵嘈雜
 人忘倦巷北還從巷南看狎客家家奏十番共賽今年正
 月半富翁百家無二三盡買斗酒顏微酣如此晴明天色

少更望明年燈節好

祭竈詞

天氣嚴寒臘廿四薄俗家家成故事秘祝方言當綠章胡
 盧笑看村農祀濁酒如錫果餌鮮辦香繚繞燭花圓潔淨
 先教爨婦避送君上天君色喜一家瑣碎君熟聞箋奏休
 觸天公嗔明春奉迎還家門福祿當如前所云蠶絲米麥
 收十分

口數粥行

祭竈質明日廿五滌釜作糜五更煮方法如常號口數齊
 向中堂聽區處雜揉百果炒蔗糖一杓均分香勝梁大兒
 老饕減晚飯小兒牽裾索一分點婢竈前先竊嘗殘杯纔

及亡羊減主人積誠燒柏燭牋上天公祈降福靈云明秋
高下熟盼到殘冬再炊粥

爆竹行

臘月爆竹聞自昔俗近仍移在元日晚列辛盤几拂塵地
爐種火堆烏薪清晨吹燄藥微透閃爍晶光精怪走頑兒
掩耳被罨頭隱隱猶聞牀外吼開門利市汝莫驚三聲屋
瓦為鼓傾無災無難百事寧出門入門康莊平竹紙迸碎
觸脚底縱有神姦不作厲家家相見拜新年更賀昨宵得
美睡

燒火盆行

歲除轆轤二更後盆中添火明于晝村兒野外燒豆豉家
督庭內燔山柴灰黑煙青光燄白百鬼奔騰勝奇磔莫笑
貧家有底忙團圓老大坐相望共祝明年飼蠶月細繭多
收禦栗列一家老幼衣裝絛也似今宵火盆熱

照田蠶行

牛孃湖傍村四五競縛田蠶蠹田畝橋燈百盞若流星爆
竹千聲過亂螢共道連年五穀少雨要停勻水要小更兼
四月養蠶時日暖晴和天氣好金鼓夜鬧村西東炬光照
耀差相同麥定有秋黍芄芄蠶繭如甕稻無蟲

分歲詞

歲除典祀今昔同辛盤柏酒前人風龍鍾阿翁年踰艾餒
罷呼孫共守歲爐撥殘紅為蕪香果餌羅列重煖房內中

歲饒最得法甜于蔗漿白于霜此翁不知耄將至舖啜猶
存食牛氣鳩車竹馬事茫然老大惜難再少年翁言今生
無別願但願手足常頑健出入人誇矍鑠哉九老者英當
有分兒童競前挽翁鬚年年為翁上屠蘇

賣癡歎詞

兒童髡健夜忘寐共喜明朝是新歲南村北村千百家絕
少癡歎來賣買須知二物不可無今何不足昔有餘人情
日偷俗日薄石湖兒之應揶揄腐儒不識世高下獨欲買
之嫌沒價渾淪元氣寧須錢但與莫斬終其年

打灰堆詞

階莫落盡衆星爛舊俗三更打如願盤空灰舞暴殘籬澆
却長鬚赤脚衣百餘年來不復祝漸曉猶貪春睡足家督
連年折閱歸惱鄰鷺鴨少雛兒桑餘附枝麥減岐長袖換
得短後衣未知此婢何家住我亦難將汝致語倘然饒足
須一呼不惜親酌宮亭湖

送龔檢討往江寧謁座主熊公

飲罷歌驪問所之青溪橋畔訪君師曲江風度今何似莫
是鷓飛冥冥時

聞韜荒赴江陵幕

才名一日滿人間忍作江陵遊子顏若使先生為下客不
妨靈運載同還

逸超就婚金陵諸公醵錢催妝口占一絕奉賀

日暖藍田生玉煙。送君南去雀屏懸。阮郎三十纔婚娶。不是名流莫入錢。

打魚詞二首

漁郎十五能盪槳。漁女十三能結網。忽聞打魚牛孃湖。與郎一心同鼓掌。

南船逆風來。復緩北船乘風急。如箭一時齊集澄潭中。兩兩鳴榔撒網牽。

聞韜荒自江陵歸

行囊羞澀客魂驚。一劒秋橫南郡城。曾在清油幕中住。不知世有謝宣明。

禹九失子時。僕有此後添丁。未必難之句。今果舉一

雄。遂作詩識殊可喜也。

須知此子定能成。况有前詩識甚明。恰合當年賓客句。一枝吹折一枝生。

張墩

泛宅浮家在此中。藥畦竹徑兩三弓。世間縱有爭墩者。萬頃湖光定屬公。

巴陵曲

橘社書傳涇水陽。俄驚龍戰血玄黃。宮中旋奏新翻曲。知是錢塘破陣章。

省試後自嘲二首

燭跋三條竄受辛。那知容易感沉淪。時光寂寂君休問。鄧

禹何曾笑此人

高密有當得郡文學之語見范史中

易學傳家信不同董帷管榻也專攻大慙文字吾何敢始
覺齊等尚未工

伯母撫周氏姊及余妹以壬午甲午殤今歲戊午山
年弟復殤其長女以一詩悼之

每逢午劫涕闌干七十慈親慘不歡重憶卅餘年舊事一
生三度哭金鑾

食跣齋荷包牡丹示家武寧謙六

春光日日過憑軒穠艷枝頭花正繁縱似紫囊休教帶若
名紅藥不妨翻纖腰趙后風前態薄醉楊妃醒後魂最是
泥他腸斷處對人欲笑獨無言

卷四終

柳塘詩集卷五

詩五十八首

金閭送大兄入都時余亦將假館武林

弟客錢城兄帝畿金昌亭上共獻歎可憐今歲同巢燕
纔出門時便背飛

南權署為宋宮遺址高廟內禪後移仗於此今署中

芙蓉石猶故物也詩以慨之

縱步頻尋二友軒故宮遺石尚堪捫玲瓏鷺嶺飛來秀突
兀高峰聳處尊競擬顛名推北宋莫忘勗禍在中原劫灰
五百餘年物銅狄摩挲易斷魂

岳墳

此日重思龍漢因墓門松幹久成鱗悲呼伍相真知己笑
許于公作後身無復祈連能起塚不堪滄海復揚塵惟餘
明聖湖頭水依舊洄漩長白蘋

湖上

晝盡湖山景尚遙不堪人事日蕭條何時得遂嬉春願亞
水枝枝映六橋

武林舊事有感四首

仕宦曾傳車耳謠子公力在帝城遙先生一霎登仙夢
贏得人間訟庶蕉

朔風蕭颯貫城秋憶到鄉關觸緒愁金斗風光良不惡此
時纔解望山頭

自詫容公術更精且將此味敵公卿燈前細讀蒙莊注單
豹何曾解養生

舉幡聞昔訟陽城青史于今尚有聲魯國諸生千百輩何
無一箇肯西行

馬上書所見二首

揚鞭偶過郭西偏風漾征塵拂馬韉多少山村稚髻婦男
兒衫袖立門前

羶車細載歷嶽岑魚鴈無從寄葉砧解散行纏除却髻語
言猶帶浙東音

晤初鄰得韜荒近信再次前韻

聞君日日倒壺觴勝事幽情許共商子美有懷堪自放嗣

宗惟慎可言狂結廬猶未離人境忤俗真宜住醉鄉也擬
重吟衿上句卿如無我更誰當

步孤山下

散帙猶存君復詩每尋遺跡步湖湄老梅大鶴都無了未
必青山似舊時

湖心亭晚眺示學人張友仲

宛在中央一水亭湖光掩映日晶瑩亂山都在西窗外不
及高峰兩點青

湖心亭險竿戲

水閣風輕縱棹探木熙呈技能俱慙若將此段當危語便
勝桓玄殷仲堪

岳墳

樵蘇百輩惱山靈鄂國墳邊草色青何似越江龍蛻後冬
青樹下兩函經

于墓

華表峩峩在水濱于公墳對岳公墳當年化鶴來過此各
見臯亭駐北軍

西陵橋

曲檻低欄舊袂邪王微柳隱擅容華只今松柏西陵下可
有藏春小小家

宛轉橋施魚

數載烽煙羨此魚乘空游泳儘安居盈筐寒具攜將去宛

轉橋頭施與渠

見西湖僻間詩為書一絕

最是西湖可惜時白蘇佳句並紫思擅場能事吾何敢不
作禪房疥癖詩

龍淵香露菴與晉上人坐雨因次梅村先生梅花菴

聯句六十韻寄海寧查韜荒歷敘今昔以當晤言

偶買鴛湖棹精藍跡久淹高春風便颯薄暮雨尤霏密霧
宜藏豹重雲直掩蟾掉頭鷲鵲噪吹沫喜魚噉逸興歸吳
質禪心付道潛煙霞差已勝詩酒孰能兼查子才真健詞
場律最嚴閉門貪客過覓伴走鄰覘妙義參支許清談屈
籍瞻胸襟能獨曠腹笥不為廉玉識砭砭謬鋒知干莫銛

大言如倒峽綺語比輕縑秋駕間騏驎名山老祀楠壁完

還慕蘭居卜擬從詹菴苑名雖起金門祿未霑養親棲海

縣娶婦出江瀟屈宋騷情古衙官士論僉行囊無俗物小

艇載書籤圍解青綾障裝輕玉鏡奩已上述韜荒少年不
偶及就婚以上之事遇人多

侷儻使酒罵壬儉跡偶同傖楚途疑奪釜鬻詩悲蘇軾案

史鑿馬遷闔面任輸心笑人看覆手炎物情常變幻世運

尚韜鈴肯逐狂瀾倒真同沸鼎燭詩書幾獲落士族盡危

陷邊境方開拓東西久被漸兒童成項領骨相半髡鉗法

網雖差密潢池幸各殲輕軺遊越嶠匹馬上滇黔劔飾新

裝欄車漸舊布幪真王遺玉案大將脫貂襪問道離蠻徼

全身返里閭曉霞隨北首落日背西崦舊雨人還集玄亭

草重苦放歌狂未減雅謔口難箝茗許分曹戰詩教刺燭
占愁懷能自遣苛禮不須砭

已上述韜荒倦遊滇粵并錯舉
癸卯以來詩事以志搖落之感

世孰嘲

揚子吾曾識宋纖敢云酬白雪深媿突無鹽贈縞情方切
題衿韻共拈客情頻作惡孤憤正如惓何獨邀君盼須知
未我嫌疎頑常抱病寒熱幾生疔公事真難了詩逋日每
添無才探月窟有夢攬霞襜故里溪山隔他鄉柳絮粘買
舟隨溜放挂席愛波恬夷惠間何妙中邊味果甜小園收
芋栗蔓野種蒔葦葦樹蔭鈎鞞鳥曾橫撥刺鮎藥猶他日裹
旨為御冬腌艷曲依元製銀箏看妓摻黑甜成栩栩軟飽
定厭厭徑訪王猷竹梅巡杜甫檐門留題豈媿牀下卧何
謙欲蠟漕溪屐先沾秀水帘招提經唄合宰堵頂輪尖話
舊情偏切懷人語近謔短章如見報恍對海昌驂

余夢與鬼物往返送難幾為所屈覺而賦此以志媿

冥漠君才我不如曉窓深愧黑甜餘何時得遇王延壽傳
與東方罵鬼書

雜題六首

令甲初嚴轉粟程五年閩楚苦論兵司農仰屋無他策額
外新添郡縣生

星沙諧價仕途新冠蓋我我儼縉紳拜哀仲華曾未識莫
將才語向斯人

公車章滿薦宏詞若箇磨崖解勒碑三禮賦成君第獻只
堪鼓吹太平時

此日方知廉吏難，膠城聲價滿。長安臺班已解相，推重政拙催科合左官。

綵筆能將氣象干，潛郎頭白主知難。嚇蠻諭蜀尋常事，第一人須第一官。

家公昔日喜談兵，海外曾成君子營。今向落楓江上住，一雙老手種蕪菁。

七夕風雨張圖麟先生招同方外楊生集二友軒

小庭堅坐喜新涼，瓜果堆盤次第嘗。日午乍驚風雨晦，夜深仍放女牛光。客懷誰覺良辰美，世態吾知拙味長。此後窮通俱莫問，任他人笑酈生狂。

弔故司馬四明張公

日落臯亭風怒號，十年成旅總徒勞。生悲張陸忠魂壯，死恨金焦殺氣高。朱噶尚沾柴市血，素車猶見越江濤。客中媿乏椒漿薦，弔屈文能續楚騷。

寄逸超

每擬齊梁駢麗詞，雕蟲小技亦安施。鬪雞檄就才原薄，驚蜨文成體最靡。吾黨孰為王濟叔，人間道有蔡充兒。莫嫌樸學無人問，甘苦年來但自知。

圖翁示菊前飲酒詩次韻奉呈二首

老圃秋容耐早霜，撚鬚覓句更傳觴。人誇此日東籬勝，我愛先生晚節芳。落筆每驚詩律細，銜杯何減少年狂。花前幽意誰能用，不羨他家金錯囊。

先生有憂貧之歎故落句及之

數本叢殘傲薄霜。貽詩重乞續前觴。敢同冒雨詞人調。最
愛餐英騷客芳。擊鉢却嫌才易盡。當杯尚喜醒能狂。和歌
幾帙成佳話。付與奚奴舊錦囊。

讀枚馬淵雲史傳寄呈鈍翁先生四首

待詔紛紛上直廬。高文典冊定相如。武皇采入西南阻。下
馬誰為露布書。

綺靡文傳是子虛。曲終奏雅竟何如。後人嗤點凌雲賦。曾
讀當時諫獵書。

金馬祠神事已遙。子淵才擅漢宣朝。非無聖主賢臣頌。只
教宮人記洞簫。

文似相如入室新。漢庭誰是薦雄人。君王若許陳玄舛。何
必桓譚歎絕倫。

已未至日

歲暮氣尚暖。幾忘至日長。人間添弱線。地底動微陽。曉雨
不成雪。朔風吹欲涼。司寒偏爽候。不識此何祥。

五世

五世家門尚涕零。生兒况復得寧馨。幅巾微去將頭白。珥
筆歸來未汗青。定有詞人傳真隱。不須妙筆檄山靈。斗邊
尚許光芒屬。厭看東南處士星。

奉呈父執鈍翁先生

大雅今誰作。先生實起衰。斯文良未喪。吾道豈亡岐。系屬
名賢後。學為天下奇。數行常並下。隻手不停披。屈宋纔堪

僕融修始許兒精微穿溟滓摧陷决藩籬制作超秦漢源
流述孔姬會當崇雅調直欲黜浮辭免穎堆成塚烏丸洗
作池甫能高紙價鼎妙解人願早被鄉評重無慚前輩推

先生幼時為勿齋徐公所重

嘉賓傾北海高會動南皮簡即當筵授詩教刻

燭為連篇驚脫腕一字定沉思重有希文任還殊章句師

胥江施馬帳楓郭寄鶴枝

先生曾於郡城及江邑授經

碑競題黃絹人爭歎

白着能無讓頭地敢不撤臯比茂苑分壇玷文人各鼓旗

於時有慎交同聲兩社

俱甘牀下拜肯向管中窺抱璞頻遭削封侯屢數

奇祭詩聊自解煮字亦當炊簡練曾錐股安吟幾撚鬚坐

穿管寧榻憤下董生帷匣裏雖埋劍囊中乍處雖一鳴魁

省試兩榜捷春司海子朝初罷

是年庶常於海子臨軒親定

郎官秩未卑台

堦需不次選部例循資掾競求三語操先凜四知地曹嚴

筦鑰秋憲恤鞭笞序屬年勞久官隨昔牒移弘終歸齷齪

黯不受招麾恬淡應如是經綸未已而飢偏憐朔死寂苦

笑雄疲俗吏羞同調鴻儒略等夷郎潛逢 聖主朝隱在

明時痛值龍胡墜哀如鵲口悲攀因銜 國恤拜為感臣

私孰立天傾柱誰張地絕維雄圖歸 主器寶曆紀康熙

政訝多門出阿疑倒柄持度支嚴賦最執法議毛吹莫負

倪寬詠空懲元祐碑捲堂傷 國體薄譴荷 宸慈直道

猶援止深恩未忍辭簿書多瑣屑吏卒半疲羸敢謂斯官

小難將厚祿尸朝衙勤案牘夜火尚唧唧舊恨惟飛盞新

吾只論詩慚須因大好醇恐累微疵夫子真瀟灑諸公並

委蛇編修功矻矻光祿語惇惇王李膺竒抱劉梁秉瓌姿

數公俱見先生所刊類彙中

時時同几案每每接巾綦靜校銅壺矢閒彈玉

局綦擬韓調張籍仿白和微之下筆俱無敵論才各不羈
異書要共讀奧義許同廟世苟親儒素吾何懼險巇除官
仍會計權稅算高貲考幸無虧額瓜當以歲期席門猶舊
邸襟被返單騎寧忘涓埃答唯希竹帛垂胸竒曾未吐腹
筭竟馬旋簪筆思追毅牽裾夙慕毗但杼經濟略可監治
平基充位曾無取歸田了不疑藥欄依竹徑水檻傍魚陂
課僕苦堂草邀鄰蓋屋茨門能教鶴守牀合使龜搢朋自
來三益歌還出五噫山塘迎屐齒花塢挽車綏對酒論歌
拍呼僧問米篩羹常燒玉版鱠解縷銀絲年願韋編假歸

嫌誓墓遲待時無不可學道頗相宜處若參夷惠人疑半

黠癡漁樵容爾汝賓主忘何誰緒論誠金石丰容足羽儀

別裁恒汲汲弘獎更孜孜六籍當為本諸家並取禪辦香

原有在秘枕祇如斯愚亦親提命人俱藉指搗小儒慚破

碎外道疾淫詖門戶何曾峻生平不自欺人豪如玉局道

濟即昌黎梁國無從嚇玄珠許獨追世方推祭酒朝已薦

宏詞共羨山公啓誰知好爵縻拙遲堅隱豹敦過遽歌驅

家近魁三宿光燃太乙藜尚方支寶鈔內府給諭縻綵筆

干天象丹心向日葵陳詩皆諷諭奏賦必箴規寧受群情

妒無令識者嗤名幾齊北斗舌恐翕南箕小試看游刃藏

鋒露鈍槌何妨言稍遜肯與俗俱隨待價終藏器知幾便

守雌不知大官肉可勝故園芝

別西湖

若向錢塘問所知湖山佳處最心期
幾回別後情懷惡難忘陰晴變沒時

懷西湖

呼唔纔罷即開關短策輕舟信往還
每到煙雲烘染處分明幾幅米家山

春日懷靜觀堂梅石二友兼呈圖翁

算罷官緡坐此堂望中二友興飛揚
南宮丈石玲瓏秀東閣官梅爛熳香
水部詩成堪諷詠尚書期在足徜徉

時先生權期更
月展愚蒙大有難忘處特與殷勤寄短章

橄欖和長孺先生韻

異果生南國嘗新俟早秋艱難來越嶺
迢遞及吾喉種不踰閩界鮮誰問樹頭
初猶驚口澀漸已覺涎流形偶同膠

棗珍應過海榴食經為上品茗椀少伊儔
崖蜜甜終勝河豚毒可瘳野人如見贈情
比木瓜投

書秋笳集後呈家弘人先生二首

憶昔羣賢集衍源連枝意氣最軒軒
陸機文采難家弟張協詩篇掩哲昆
一自髡鉗遭漢法頓令賓客歎雍門
朔方徙後才逾健讀罷淒然感在原

眼前數子孰君如往往懷鉛上直廬
愴父三都堪輟簡陽秋一代幾成書
未知馬角生何日更少魚腸慰倚閭
京邸

故人常問訊揚雄文似待吹噓

醉

若論江鄉事年來最可傷蛛因蟲布網鬼倚虎為俚天意
高難問吾生舍欲藏驅除愧無力一醉付茫茫

哭魏名閔

我親昔罷官傲居在漢上平時車馬客今雨不復在與子
少平生叩門獨見訪貌如山澤癯內潤復外朗自言棄諸
生形骸久放蕩篤嗜老莊言物外起遐想尤不喜俗人掉
頭輒孤往獨尋女之翁愛其胸倜儻我須嚴事之以作高
山仰亦當弟畜女發言共欣賞翁學如長公女才過叔黨
置之古人中于今實無兩我親少自奮詞場早掉鞅遇事

無不為落落久骯髒中歲更憂患跡差古賢仿我質實驚
下學未知所向蚓竅發蠅聲略能探微茫小技安足尊子
得無過獎敝帚幸自知慎勿千金享黃帝遺玄珠得者惟
象罔願與為雲龍事誠在勉強彼賢亦人耳此語即息壤
子時壯我言意氣益慨慷謂我且老矣焉能女相長羹牆
見義文損益理頗講女其際風雲我甘守菘蔣結廬泮水
濱大類東西瀼濁醪過牆頭瓦盆時在掌頗得醉中趣孤
懷寄泮莽一身常覺多天地翻未廣癖好蠟遊屐一生着
幾緗長恐足蹒跚不能及疇曩因慕宗少文毫端寫西爽
撫琴時動操衆山為一響更有聰明兒老樹添巔嶸案頭
鶯溪絹頗解窮物象蠻君與鬼伯旌幢森隊仗尤工聖帚

法體勢極動盪當其得意時疾書燦銀胸間作古詩歌筆
端賈餘勇肯辦香竟陵騷壇共馳騁任捲蓋頭茅日拄過
者杖我嘗走過子掀窻室塏壤請以書畫船顏于室中榜
道書手一編鉛汞得內養方期追羨安何遽沒塵埃人生
如樹花飄落異溷幌子才堪凌霄鍛翻常引吭即今六七
年干戈勢擾攘出子囊底智攬槍銷寒芒葉公非好龍此
意竟悽愴穀貴歿斯人聞之心惘惘磨鏡遲弔子寢門為
設饗典刑誰復存虎賁空想像

過長孺先生讀其所註春秋

楓江郭外帶經鋤客至常從硯北居未許春秋成倚閣諸
家疑處讀君書

答學道者

自省何堪論昨今年來不覺鬢華侵雖然未得安心訣也
解窻前戲五禽

輓黎川汝君喜先生

崇禎壬午
殉難故城

奕奕儒林殉義聲先生曾不負平生軺車名士身多辱首
藉寒官節自榮當日銜鬚真慷慨至今藏血尚分明九京
英爽歸何處欲令巫陽筮故城

舅父沈始仁先生力疾窻我外祖父孝甫先生余適
館武林不及執紼襄事歸呈舅父二首

吾舅營窻窳焦勞廢寢餐傭身幾似永收子定如難葬為
踰時急魂因吉壤安自憐違執紼再拜淚汎瀾

元塚累累甚春風草漸生舒難成宅相肥實備彌甥拙筆
慚為狀遺言莫乞銘萱堂幾淺土感激渭陽情

除夕

牢落從他歲序遷絕無人怨與人憐平生受盡癡豔益論
價應須十萬錢

頻于歲首望登場睥睨形圖困與倉聖帚如椽戈法在銀
鈎親署萬年糧

葉子分曹興欲飛分明奪得錦標歸眉間黃色羸如許也
是先生戰勝肥

羨殺烏衣年少郎芝蘭玉樹也成行一家子弟燈前戲跳
虎累碁蠟鳳皇

父執沈介軒先生八十二首

曾同諸父擅詞場風雨年年共對牀人樣只今零落盡典
刑真作魯靈光

社結耆英孰與儔一時老宿並風流樽前小友家君在甲
子于今也一周

柳塘詩集卷六

詩七十七首

早春郊行

嬉春最愛鐵崖詩出郭門來路漸歧
柳樹舒先臨水穗梅
花開遍向陽枝行因地僻何妨誤歸戀湖光不覺遲
此後賓朋莫相忘挈壺重訂踏青時

哭徐木容先生

先生言大信非夸鵬集承塵悼日斜
穀貴潛夫竟長夜道
窮玄草散天涯遺書曾許全歸粲負土何妨獨累芭
文苑儒林俱傳入料應不媿古方家

觀棋二首

高齋集好友坐隱問楸枰品爲輸先劣局因爭劫羸儘堪
消永日未可竟橫行萬事無憑準奕師有定評
鏗然落一子良久意何長舊譜千百著空盤十九行覆棋
知筭失審局鬪身強姑婦中宵語君聽莫漫忘

玉峯顧兄子雲學仙而余素不喜二氏之學與余莫
逆而道不同因賦一律兼示令兄子豐

三旬強半是清齋入道寧能與俗諧仙爪爬時形似鳥紙
驢騎出健于騮我而效子還當敗卿第如吾也自佳記取
綽墩詩句在儒衣僧帽道人鞋

喜張弘蘧南還用起雷韻

落月猶驚滿屋梁俄聞才子返江鄉旗亭賭後詩真老笛
步邀時興若狂五兩定應諸客况一編獨許壓行囊相逢
莫話春明事樽酒論文漏正長

延陵十字墓碑古歌

世家獨表讓王里千載梅花照江水厥後高風附子臧也
是王家老孫子州來季子真奇絕歷聘觀風來上國縞帶
論交有數人東魯素王稱第一愛子藁葬羸博間來觀三
歎稱其賢誰知延陵復坏土豐碑十字新題阡字體蜿蜒
大千掌蛟龍攫拏氣騰上定有鬼神來護持蒼蘚摩挲至
今仰吁嗟漫漶不可識好事臨摹入古帖棗木肥刻畧失
真猶當壓倒籀斯筆君不見岫嶺山頭神禹碑年年光怪
走蛟螭一時高堂張素壁定是人間兩神物

落落

名場類落落不覺鬢華侵吾未分新故雨仍論舊今酒甜
澆小戶句穩悵秋林若遂浮家去煙波不可尋

潯西

何用爲人畏君宜味此言不堪虎而翼况復鶴乘軒絲尚
幾時絡莠今猶在門茫茫天道遠萬一鑿煩冤

鈍翁先生乞歸未及上謁奉呈二首

引疾南歸整角巾千秋大業屬誰人池邊是客還蹲鳳史
局何年紀獲麟誓墓未須懷祖忌挂冠惟有隱居真草堂
檢校無他事重理晴天舊釣綸

居半山城信倚筇玄亭問字各相從牕中免水峯頭樹枕
上寒山寺裏鐘兩地草堂營杜甫數椽別業老龜蒙幾番
載酒難輕過未得先生近日蹤

出湖推舟二十里達吳家港二首

蒹葭叢處亂舟橫千頃澄波勢頓平三寸水如平地閣一
帆風似逆流行何時王勃能前達此日湖神覺世情記得
昔年諸父老縣東橋上看波生

今縣署左有
看波橋尚存

憶昨洪流起怨咨丁錢疏鑿亦何爲若論故道非難復欲
看桑田漸有期敗葦叢生淤水勢濁泥數斗長洲基鄙經
原委無人問漕粟東南力轉疲

鈍翁入城過謁畱宿

昨得吳門信先生已入城一衣帶水隔卅里鏡中行前語

猶重理新詩復續成依稀宿山閣梁月落三更

石塢山房詩爲王咸中賦

王郎家在城西住文恪當年怡老處鑿池宛似太湖形七十二峰風雨暮仲兄生綃好寫圖庭禽生動花扶踈叔也善皴山水法平泉泉石皆臨摹王郎掀牕坐簾閣閉門不減深山樂兄搜画笥弟聯詩胸中儘自饒丘壑一朝築室堯峰陰王翰移家爲卜鄰石塢西邊鈍翁宅棄官浪漫灑之濱我翁據几方著書每佐註牋讎魯魚高興忽陟妙高頂呼僮常並巾柴車數椽結構頗幽致妙得賢兄画中意又似掀鬚覓句時興與之會纔位置門前諸峰高插天門內曲折流清泉小橋橫鋪三折版高堂清晝生雲煙扁舟我昨來相訪德公元直期偏爽竟呼作黍候君回間搜秘玩狂歡賞古鼎斑剝几髹漆法書名画盈紺帙詩瓢尚未付郵筒頌琴猶自張空壁小庭方幅成規模遠山一角爲陂陁主人他出客竟入一一領略迷歸途明晨重約過山房自汲山泉煮沸湯指點槿籬行坐處澆花種樹足徜徉何似西城舊池館魚鳥親人意蕭散草堂兩地信往還一齊付與詩人管况有鈍翁互主賓我亦喜結林泉因分張此際難爲別湖山真箇解畱人

獨坐齋頭寄山年定侯兩弟

獨坐蕭齋手一編影形神互與周旋但將白眼看天下難使黃金買少年爾我自應居戶限弟兄只合對牀眠欲誇

一事休嘲笑黃卷中曾見聖賢

香奩瑣事詩次韻二十四首呈家聞瑋先生

偶因瑣事寫閨思
小幅濤牋展筆遲
何似錢塘瞿長史
香奩遍和鐵崖詩

滿庭新綠襯殘梅
風信頻將花事催
愛殺天桃映儂面
一枝不遣出牆來

柳暗官堤春尚遲
綠煙金穗踏青時
郎言寒食須簪戴
纖手攀來折兩枝

頻因鬪草數名花
圍坐中庭藉絳紗
只爲謝家傳寶樹
人折得晚蘭芽

尾掉雙紅名不虛
盆池游泳儘安居
捲簾斜倚闌干看
水藻中浮啜食魚

百六風光春半過
最于元巳賞心多
硬黃搨得唐摹帖
幾晴窓天氣和

穿隻金針剪幅紗
絲絲不繡舊時花
爲完大士菴中原
兩首長旂水月華

清明節近種蓮成
六月窓前花映明
拄頰看來曾不厭
愛他古德舌根生

郎喜交遊緩半華
一生蠟屐向天涯
客來斗酒頻呼婦
屈曲枯藤記妾家

復復堂前有老藤

額抹雄黃態儘妍
榴花簪髻更嫣然
兩回端午休虛度
綵索羅囊一樣懸

峒頂初開白白花
周遭千本勝桑麻
閨中亦有旗槍陣
活火教烹穀雨茶

午枕橫陳竹榻低
今朝卯酒醉如泥
雖然不作遼西夢
也惱黃鶯枝上啼

炎曦日似小年長
亭午陰陰水榭涼
拾得兒郎泥彈子
拋鷲一對浴鴛鴦

幾盆茉莉與珠蘭
上覆藤陰小閣寒
尚有清涼散一帖
綠沉瓜浸水晶盤

淡掃蛾眉薄卸妝
為除髮垢趁初涼
亂雲委地光如鑑
不與夔妻競短長

月上妝樓晚倦梳
殘編手內映窓虛
五車三篋男兒事
一卷班家女誡書

滿口生津齒頰香
蔗霜雪白熟梅黃
為郎下酒無他物
親印盤龍八寶糖

閨中未許不羈才
銀燭高烧綺席開
怪殺酒兵渾不解
又飛梅陣勸深杯

詩題葉上井梧天
絕勝高麗側理箋
字值三縑人不靳
一齊施作佛燈錢

蜀錦裝潢梵夾成
巾箱小本手嫌輕
團團忽悟無生話
共呪儂家靈照名

斜紋織造稱織腰
水墨彈須倩若曹
却與梁家推髻婦
木棉衫外束絲縹

南國名花不耐寒
幾枝藤本種猶難
紙窓最愛東南向
冬日朝烘護樹蘭

梵行清修不厭貧
佛燈一盞孰傳薪
淡妝自定兜頭樣
一幅觀音大士巾

佳句惟堪夫婿論
一時詠絮幾篇存
而今籠却生花筆
不許輕將布國門

歸家抱第三男二首

二月離家久
渾疑生客來
乍呼身嬾撲
數認首重回
撫背眠差穩
巡檐懷欲開
預愁成立後
老景已相催
雖未能言日
誠求易得之
見人頭便掉
欲去手先推
啼笑嫌多事
嘔啞似有知
尚平婚嫁畢
五嶽興應遲

聞韓希一趙昭野將上星沙便道訪余先作詩遲之
西吳山水鬱蒼蒼
二妙詞場久掉鞅
雅瑟縱工難入奏
玉卮不用豈無當
采蘋方欲過
苔雪作賦真應弔
澧湘何日驪駒歌一曲
為留信宿話連牀

二蟲詩

來往花叢日正盱
喜於羽族托微軀
翩翩漫逐當途逝
栩栩曾從蒙邑徂
只與山蠶為好友
敢因橘蠹論新吾
人間苦愛輕盈態
搨得滕王舊作圖

右蝶

唯唯誰能重譴訶
卞彬賦就意如何
輕雷解褐田間出
細雨拖青池上過
兩部鼓吹堪奏少
一時叫噪為私多人間

未厭淫哇聒大雅遺音不復歌

右蛙

諸子

諸子年來歎數奇兒童項領問何誰那知泣血相明日又是送人作郡時讀史聊為下酒物行吟休注反騷辭可憐潦倒俱相似一味癡頑願守雌

一事

一事人間並莫爭底須與我暢幽情唐摹帖購臨千本宋刻書收敵百城怪石古盆添水潤沉香小篆裊煙清綠章頻向天公乞便欲其中過此生

冬餘

冬餘客館枕松江伏櫪雄心氣漸降最苦涼風當北戶每貪朝日耀南窓中書卒歲將成豕歡伯多情未竭缸若是客來為二仲夜深猶許剔銀缸

感織婦勞因述其事

木棉絕塞來中國甚利便開花鬪秋葵一望高原遍結子復垂垂功敵純綿半枝吹朔風悴色暴秋陽變賈人死射利糶載歷鄉縣健婦勤女紅十指苦皺倦買歸喜孜孜長幼圍坐揀核車設機械脚翻轆轤轉精光無纖瑕如玉出于闐爰有文木弓其弦直于線一彈花為飄柳絮因風旋再彈雪大作糝徑目雙眩鼓聲響嘈呖空中鳴箭况復續續彈兩軍正酣戰鏗爾寂無聲邕琴絃忽斷劃然分手

中抽條世稱善紡車張一弦宮羽更移換一起復一止音
節覺促短弱女小解事學母手屢牽積久作一團經緯皆
中選如棗銳兩頭纍纍珠貫串理緒入扣中邊幅稍逾絹
日織三文餘兀兀忘歲晏催科吏打門貨市完公限終歲
飽辛勤短褐不及綻好語天下人尺布慎勿賤

述寄沈大兄晉公

少學制科文大略觀經史其辭稍瑰琦謂不中程軌文章
尚波瀾邊幅窘坐此稍稍熟諧聲感托識與比盡發篋中
藏大言怖洋纒問竒孰揚雄一一偏傍揣遇不可句讀亦
輒以意擬於義終未安強半句下死蓄疑或久之胸如有
物痞一事忽豁然再四咀未已雕版多魯魚俗說尤鄙俚

決擇愧未能詞林少根柢家貧難致書偶得善本喜參互
諸說家略能探原委勉強風雅途今古怯驅使腹笥羞祭
魚筆端苦點鬼况敢輕薄曹宋玉老兵毀多師古所誠此
中有肯綮偽體誰當裁我甘執鞭弭利病貴倚撫一字未
輕詆蚍蜉誠小了哆口肆排觚俎豆一先生彌望皆茅葦
騷壇失桓文無疆執牛耳謬種遂流傳江河不知止干謁
達官門聲名一日起兼之以射利佳傳索餉米篇首題鉅
公簡末綴豎子而我最晚出安肯雷同彼姓名挂其中有
識所不韙相戒勿示人藏拙亦爾爾詩律貴師承妙語透
腦髓我愛小乘禪佳句多斐亶吟誦常數過何必非正始
詩外有事在少陵有微旨放翁祖述之興會亦媿媿例及

衆家詩源流差可指悠悠安足論任目笑腹誹嗤點嗜痴
翁誠何所逃罪多口真可畏舉動見疢痲顧子獨首肯議
論不我鄙掉鞅詞場間兄賢愚者弟斗石論才情未逮三
十里氣盡見小巫大笑鄙下士寧無燕許公華檻山林啓
東脩從之游譏彈定唯唯學術有原本方可空傍倚勤攻
已所短焉能安癥疢晚節幸勉旃子當進乎技

夜二首

孤館篝燈酒細傾推窓萬戶靜無聲坐深不覺星將轉胡
後頻看月漸生學為貫穿書尚少詩須罄策句難成華胥
不遠休輕過肯負牆邊舊短檠

朔風蕭瑟響颼颼兀坐中宵誦讀勞硯側記籌書課準燈
邊立熾火光韜酒欺小戶休教醉琴許無絃未學操只有
巴詞剛數帙人間紙價幾時高

有感

束縛難酬知己恩此生自分老丘樊瑣廳厄似黃楊閨蠟
屐厭登白下門未必南山無仕徑須知峽水有詞源短檠
依舊留牆角一一重將秋卷溫

草堂無徑少人過
霖霖屢拙行多囊中何堵頰羞澀篋裏陰符費揣摩微分
也難甘伏櫪唾壺擊罷復高歌

書壁

即今大雅果誰歟偶向陳編事佃漁一望葦茅知徑塞每

看箕斗覺名虛魚緣洗硯時吞墨蠹窟裝池易蝕書誤盡
人間文與字掃除無力但款歔

借書

重向齋頭理蠹魚名場勝敗任何如文瀾稍濶緣繙史酒
券常添為借書苦覓小胥嫌景短貪看善本愛冬餘百城
容易堆高閣此段生涯計未疎

書南史後

翟泉曾記出蒼鶯南北鴻溝奈若何四代功勳韓白少一
時名理老莊多長江洶湧愁天塹王氣消沉等逝波猶勝
前朝重建日隔江旋唱後庭歌

讀建文時雜記

遜荒蹤跡杳難憑野史紛紛記載仍共道西洋尋少帝復
傳南內返高僧興王事業俱圖閣湛族忠魂尚撫膺寧少
陽秋稱信史最難直筆是長陵

吾村

數家煙火亦成村質朴風看長子孫師去便教兒識字客
來常使婢應門量晴每日占雲脚覓句千回繞樹根便覺
賤貧無不可家聲從不事扳援

以近况誇於諸子

除却科名莫與論此生何處不怡神異書暫借思豪奪古
帖多臨欲亂真俗物未須來敗意醉鄉定許著閒身數椽
幸托江湖住只合頭銜署散人

飲酒詩四首

性未能飲酒杯竿時一舉當夫與會生不過五合許東坡
三蕉葉佳話傳千古何必吸長鯨然後為徒侶

少讀小雅詩飲酒宜溫克數石不能亂三爵不知秩我生
雅自持不為罵坐客主人持耳勸未免困米汁脫巾或在
地以頭穿取得恥作狂奴態慎勿怒酒失

酒後多誤言往往醒時語隱衷難告人一一席間吐既醒
渾遺忘孰知人覩縷只宜抱甕翁豪飲當大戶我寧盡忘
機敢託高陽侶次公醒能狂定勝醉少許三爵倘或踰我
甘出童殺

古人每沉冥酒外有事在後人故酣飲亦復何所似家有
酒盈尊適興自當止苟非典午時未須澆傀儡爛醉為身
謀三爵良可矣善學柳下惠莫如魯男子嗣宗如可作千
載酒知己

假館郡城留贈從學諸子

扶疎枝格喜相交倦翮差池忍遽拋丹桂自為明月種青
松看長拂雲栒燕經秋日將辭社鵲到今年更定巢翹尾
掉頭音上下故林輕棄任人嘲

答諸子見留

兩年曾設郭門帷共擬醇儒足不窺泮泮底須龜手藥鴛
駘老作識途師熟籌行止為留計自喜青藍有勝時此後
塵埃能物色莫觀牝牡與黃驪

家漢槎先生自戍祈南還次徐宮贊原韻

羶車幾乘返江關，雒浮雲黯淡間。
好句競投多苦調，故人相見各衰顏。
倚閭老母驚猶在，屬國生兒許並還。
今日更闌宜秉燭，不禁喜極淚潺湲。

壬戌元日二首

又復一年至蹉跎，老此身但貪親力健。
共喜歲華新骨肉，歡相聚眉頭。
覺易伸辛盤與柏酒，草草欲忘貧。
在家寧失計，此樂亦難忘。
呼弟開家宴，隨親拜影堂。
仰占豐歲兆，出向喜神方。
絕勝東華客，軟紅塵土忙。

雞雛

老嫗背籬篠，行步類跛鼈。
性愛飼雞雛，賴之遣晨夕。
伏雌鳴埭中，秋卯尾後圻。
聞聲往追尋，恐遭兒童竊。
懷歸喜孜孜，勝如獲拱壁。
列置盆盎間，手為數雙隻。
累十旋售人，終歲不得喫。
孕字須及時，王政多瑣屑。
雌雄踟相戲，種類漸充斥。
取照篝火光，水晶點微白。
陰陽互變化，破殼雙雙出。
母將八九雛，出入恣所歷。
一子偶離羣，朱朱語相覓。
健鶻喜秋風，伺間摩雙翮。
攫雛爪中啼，鶯領蝟毛磔。
嫗亦戟手罵呼童，守雞柵。

沈子衷素藏其外叔祖王忘菴先生所畫扇頭叢菊
索題其後兼贈忘菴

忘菴先生好寫生物態變化皆入情
扇頭搨得菊數本風日杲杲金天晶
花枝搖曳各有態况帶秋氣兼淒清
我懷

其人淡而旨心貌俱古風泠泠亦如此花媚幽獨不與凡
卉爭春榮枝枝妙得高士韻無乃自寫其生平吾門沈子
王自出得畫寶夢同瑤瓊須知畫外有意在一一感托詩
無聲把翫數四發長歎恍疑身傍籬邊行縱然騷客餐不
得定許他日冒雨來相尋

落花游魚圖亦衷素所藏也再題其後贈忘菴

花信已過花事闌春風吹花飛作團池中羣魚正游泳蕩
漾晴空啖花影眼前有景孰寫得一任天機落殘墨歛見
高堂張此圖不問知是忘菴摹忘菴作畫如作詩與會所
至忽得之有時自寫其所見煙柳池塘在東絹前身疑是
花神謫游戲人間人未識不然亦得寫生髓白陽山人今

不死花兮魚兮兩忘情偶然相遭意態生却怪此圖筆渾
脫首尾欲動花枝活明春花飄過池上彷彿忘菴圖作障

題申叔弟所藏婦翁沈文人先生花鳥畫冊

吾鄉寫生誰擅場今有忘菴前白陽平生工夫在畫外下
筆活活神揚揚古來至人師萬物粉本滿眼憑端相山鳥
山花各情性寫出鳴躍兼芳芬文人先生吾父友漫浪寄
興翰墨場解衣盤礴聊遊戲天機動盪揮縑緗亦能脫去
畫史意力與物態爭微茫但恨二子無我法筆筆遠欲凌
風翔我家舍弟具冊子點染數幅藏巾箱開看還能飽人
否坐覺人事渾遺忘愛畫入髓偶如此小小好事疑清狂
紙尾題詩藉不朽敢謂滿口嚼出俱宮商

寄周錫漢荀

獨憶從遊久七經寒暑更壯心吾未已宅相女當成莫恃
先賢後休誇近日名論文良不易孝謹起家聲

紀事示丁大年

造物終當忌 朝廷果欲除鶴還敗道術牛已債仙書高
令身俱殉懷恩禍未紓平生依正學此日免迂疎

壬戌秋七月既望崑山作

風月堪為赤壁遊景光何似此崑丘吹簫度曲山巔上也
是一回壬戌秋

虎丘中秋寄葉學山揚州

虎丘佳麗值中秋樂府應歌清夜遊不信三分明月後盡

將無賴屬揚州

1875

書